


# বীরপূজা

[ ঐতিহাসিক নাটক ]

তৃতীয় সংস্করণ



( কোহিনুর থিয়েটারে অভিনীত )

কলিকাতা বিশ্ববিদ্যালয়ের পরীক্ষক,

বেহলা, ময়ূর সিংহাসন, প্রভৃতি রচয়িতা

শ্রীহরনাথ বসু-প্রণীত

ভট্টাচার্য্য এণ্ড সন্স

কলিকাতা, ঢাকা ও ময়মনসিংহ

১৯২৬

## কলিকাতা

৬৪নং কলেজ ষ্ট্রীট, ভট্টাচার্য্য এণ্ড সনএর পুস্তকালয় হইতে

শ্রীদেবেন্দ্রনাথ ভট্টাচার্য্য কর্তৃক প্রকাশিত

এবং

১০৮নং নারিকেলডাঙ্গা মেন রোড, স্বর্ণপ্রসে

শ্রী কক্ৰুগাময় আচার্য্য দ্বারা মুদ্রিত ।

জন্মীর চরণ কমলে ।

অর্পিতাম এই বিল্বদলে ॥

## নাট্যোল্লিখিত ব্যক্তিগণ ।

### পুরুষগণ ।

আলমগীর	...	...	ভারত-সম্রাট ।
কাশিম থা	...	...	ঐ সেনাপতি ।
রাজারাম	...	...	মহারাষ্ট্রপতি ।
রঙ্গনাথ	...	...	রাজাচ্যুত সামন্তরাজ ।
গোবর্দ্ধন	...	...	দেশভাগী বাঙ্গালী ।

আমার ওমরাহগণ, খোজা, প্রহরী, দূত, সর্দার, গ্রামবাসিগণ,  
ইত্যাদি ।

---

### স্ত্রীগণ ।

জাহানারা	...	...	সম্রাটের ভগ্নী ।
লক্ষ্মীবাই বা সরযুবাই	...	...	রঙ্গনাথের পত্নী ।
বাসন্তী	...	...	ঐ পালিত কন্যা ।

নর্তকীগণ ইত্যাদি ।

---



# বীর-পূজা ।

## প্রথম অঙ্ক ।

### প্রথম দৃশ্য ।

#### পর্বতদুর্গে রাজারাম ।

রাজা । ( স্বগত ) এই সেই পর্বতদুর্গ—পূজাপাদ পিতৃদেবের পবিত্র বিজয়স্তম্ভ ! এই স্থান হতে সমস্ত দক্ষিণাপথ স্পষ্ট প্রতীয়মান হচ্ছে ; কিন্তু যা দেখেছি আর তা নাই । কালশ্রোতে সে অতীত গৌরব ধীরে ধীরে কোথায় ভেসে যাচ্ছে । ঐ সুদূর বিজাপুরের বিরাট বোলিগুন্ডের গগনস্পর্শী উচ্চ চূড়া হতে হিন্দুরাজের বিজয়-নিশান ধসে গেছে ; ওই জয়োন্মত্ত সন্ন্যাসীদের অসংখ্য সেনানীর জয়োন্মত্ত ভেদ করে সহস্র সহস্র প্রজার করুণ আর্তনাদ শুনা যাচ্ছে ; ঐ মহারাষ্ট্রপতি সস্তাজী সন্তোষ-সাগরে সন্তরণ দিতে দিতে মহারাষ্ট্রস্বাধীনতা বিক্রয় করতে যাচ্ছেন ; ঐ গৃহশত্রু রঙ্গনাথ স্বজাতির সর্বনাশ সাধনের জন্য শক্রশিবিরে আশ্রয় গ্রহণ করেছেন ! মা অষ্টভূজা, মহারাষ্ট্রবাসীর হৃদয়ে বল দাও—সস্তাজীকে রক্ষা কর !

## [ চণ্ডীবাইয়ের প্রবেশ ]

চণ্ডী। রক্ষা করেছেন! রাজারাম, এখনও কি এই নির্জন পর্বতে বসে বিশ্রাম করবে ?

রাজা। কেন, কি হয়েছে ?

চণ্ডী। তোমায় বলে কোন ফল হবে কি ? মহারাষ্ট্রবাসীর এই হৃদ্দিনে তুমি ত বেশ নিশ্চিন্ত হয়ে বসে আছ ?

রাজা। নিশ্চিন্ত নাই মা, চিন্তার অর্জ্বরিত হয়ে আছি। ছত্রপতি শিবাজীর পবিত্র শোণিত হৃদয়ে ধারণ করে রাজারাম কখন নিশ্চিন্ত থাকতে পারে না। চতুর্দিকে হত্যাশের নিশ্বাস। স্থির হব কেমন করে মা ! বল মা, দাদার সংবাদ বল ?

চণ্ডী। সব বল্বো, তোমার জোষ্ঠ নিহত ! এই দেখ, তোমার ভ্রাতৃবধুর বৈধব্য বেশ ; কিন্তু হৃদয়ে বিশ্বনাশী প্রতিহিংসায় ! এই দেখ, হস্তে মৃত্যুসহচরী শাণিত ছুরিকা !

রাজা। স্থির হও মা !

চণ্ডী। স্থির হবার আর উপায় নাই। কি করে মোগলেরা তাঁকে হত্যা করেছে তা জান ? উত্তপ্ত লৌহশলাকা দ্বারা তাঁর হৃৎ চক্ষু উৎপাটিত করেছে। মর্মান্বিত ঘটনায় ছটফট কতে কতে আমার চক্ষের সম্মুখে আমার ইষ্ট দেবতার সব শেষ হয়ে গেল। সেই জ্বালায় উপর, আমার কোল থেকে আমার প্রাণের বাছা শাহকে পিষাচেরা কেড়ে নিয়ে পালাল। শেষে মুসলমানের শিবিরে গিয়ে আমার কি হ'ল এই কথা ! ( বক্ষে ছুরিকাঘাত ) রাজারাম, যদি মহাত্মা শিবাজীর পুত্র হও, প্রতি—শো—ধ—নাও—

( মৃত্যু। )

রাজা। একি হ'ল, একি গুলুম ! মা অষ্টভূজা, কি করি ! কি

সর্বনাশ হলো ! না—আর এখানে থাকবো না ; ভ্রাতৃহত্যার প্রতিশোধ নেব,  
শত্রুপুরীতে আগুন জ্বালাব, মহারাষ্ট্র-জাতির ঘরে ঘরে শক্তি সঞ্চারিত  
করবো, করালী মন্দিরের পবিত্র ধ্বজা শত্রুরক্তে রঞ্জিত করবো । যোগলকে  
ধর্ম বিক্রম করবো না—মাতৃহৃৎ কলঙ্কিত হতে দেব না ।

[ প্রস্থান ।

## দ্বিতীয় দৃশ্য ।

রঙ্গনাথের বহির্বাটীর সম্মুখভাগ ।

বাসস্তী ।

গীত ।

দীননাথ ! আমার দীননাথ !

এখানে বেদনা, বলিয়ে কেঁদোনা

বিনা তপজপ অসাধ্য সাধনা—

ব্যথাতে বুলাতে শুদ্ধ পদ্যহাত

আপনি আসিয়া দেখা দিলেন দীননাথ !

আমি কীনা দীনা ভাইবন্ধুহীনা,

মাতা পিতা কেমন কখন জানিনা—

অশ্রুমুখী দুঃখী, ছারে করিনু আঘাত—

হারা খুলিল কপাট—

আপনি আসিয়া দেখা দিলেন দীননাথ !

( স্বগত ) কেঁনা মেয়েকে বাবা কত ভালবাসেন ! কেন এত ভালবাসেন ? ঐ যা, ভুলে যাচ্ছিলুম, দীননাথ ভালবাসান তাই ভালবাসেন । কিন্তু বাবা আমার সব সময় দীননাথকে ধরে রাখতে পারেন না ; যেই আপনার ভাবনা আপনি জ্ঞাবেন, সাহায্যের জন্ত ঐ মোগলদের সঙ্গে পরামর্শ করেন—অমনি আমার দীননাথ সরে যান । তাঁর কি একটা কাজ ? আমার মত এমন কত কাঙাল পথে পথে কেঁদে বেড়ায়, তিনি নইলে কে তাদের কোলে তুলে নেবে ?

## [ রঙ্গনাথের প্রবেশ ]

রঙ্গনাথ । কে কাকে কোলে তুলে নেবে মা ?

বাসন্তী । এই তুমি—তুমি আমায় কোলে তুলে নেবে না ?

রঙ্গ । তোমায় ত আমি অনেকদিন কোলে তুলে নিয়েছি মা ?

বাস । তবে কেন মাঝে মাঝে ফেলে দাও ?

রঙ্গ । সে কি, তোমায় ফেলে দি ! আমার এই দুঃখের জীবনে একটু শান্তি দেবার জন্ত ভগবান্ তোমাকে আমার কাছে এনে দিয়েছেন ।

বাস । তবে কেন তুমি সেই ভগবানকে ভুলে যাও ? ভগবানকে ভুলেই আমাকে ভুলে যাবে । ভগবান্ দীননাথ । দীননাথকে ভুলে কি আর দীনকে মনে থাকবে !

রঙ্গ । পাগলি মেয়ে, এসব তোকে কে শেখালে ?

বাস । কেন দীননাথ ! দেখ বাবা, তুমি আর ওদের সঙ্গে মিশো না ।

রঙ্গ । কাদের সঙ্গে ?

বাস । ঐ যাদের সঙ্গে রাতদিন পরামর্শ কর—ঐ মোগলদের সঙ্গে । ওদের আর কাছে আসতে দিও না । ওরা আমার দীননাথের দীন জীবের ওপর বড় অত্যাচার করে । যে প্রাণভয়ে পালায়, পেছন দিক্



দিয়ে গিয়ে তার মাথা কেটে ফেলে ! আহা ; রক্তে রক্তগঙ্গা হয় !  
আমার দীননাথের কত যত্নে গড়া জীব, তার কি রক্তপাত কতে আছে !  
মিশোনা বাবা, মিশোনা, লক্ষ্মী বাবাটা আমার !

রঙ্গ । কি করব মা, মারাঠীরা আমার রাজ্য কেড়ে নিয়েছে । আমি  
এখন একা ; সম্পত্তি নাই, সৈন্য নাই, একটা স্ত্রীমন্ত্রণা দেবার লোক  
নাই—কোথা যাই ? তাই পৈত্রিক রাজ্যোদ্ধারের জন্ত তাদের চেয়েও যে  
বলবান্, সমস্ত ভারতবর্ষের সম্রাট, সেই আলমগীরের শরণাপন্ন হয়েছি ।

বাস । তারপর যদি সম্রাট যুদ্ধে জিতে' মারাঠীদের রাজত্ব নিজে  
নিয়ে ভোগ করেন, সঙ্গে সঙ্গে তোমার রাজত্বটুকুও লুটের মালে মিশে  
যায়, তখন কি করবে বাবা ?

রঙ্গ । না—না, তা হবে কেন ? এর ভেতর একটা ভয়ানক  
রাজনীতির কথা আছে । আলমগীর হচ্ছেন ভারতের সম্রাট । আমি  
তাঁর অধীন রাজা হয়ে তাঁকে রাজত্ব দিয়ে নিজে রাজত্ব ভোগ করব ।

বাস । আর সম্রাটের যে সে চাকর এসে তোমায় যেমন করে  
দাঁড়াতে বলবে, তেমনি করে দাঁড়াবে, যেমন করে বসতে বলবে, তেমনি  
করে বসবে, খেতে হুকুম করলে খেতে পাবে, শুতে হুকুম করলে শুতে  
যাবে, আর তোমার অন্তরের হিসেব পর্য্যন্ত হুকুম মাত্র হুকুরে  
দাখিল কতে হবে ! বা রে আমার তাঁবেদার রাজা !

রঙ্গ । হাঁ অনেকটা তাই বটে, তবু কি জান—

বাস । চাকরীতে বড়—রাজাগিরি চাকরী !

রঙ্গ । কিন্তু তা তির উপায় ত নেই । সম্রাট তির আমি কার  
কাছে যাব ?

বাস । কেন, সম্রাটের চেয়েও যে বড় রাজা, তাঁকে খুজে তাঁর  
শরণাগত হওনা বাবা ?

রঙ্গ । সম্রাটের চেয়েও বড় রাজা ! কে তিনি ?

বাস । কেন, আমার দীননাথ !

রঙ্গ । হাঃ-হাঃ-হাঃ—পাগলি !

বাস । আমিও পাগলীই, তুমিও একটু পাগল হওনা বাবা । বেশী বুদ্ধিমান হলেও এতদিন দেখলে যে বুদ্ধির জোরে ক্রমে বাদশার গোলামের গোলামেরও চোখ-রাগানি সহজে হচ্ছে, খোষামোদি কত্তে হচ্ছে । তার চেয়ে একবার পাগল হয়ে আমার দীননাথের দরবারে দুঃখ জানিয়ে দেখ দেখি ।

রঙ্গ । তা কি জানাইনে মা ?

বাস । না বাবা, জানাবার মতন করে জানাও না ।

রঙ্গ । তুমি কি করে জানাতে বল শুনি ।

বাস । ভগবানকে পরামর্শ দিতে যেও না । ঠাকুর, তুমি এই কর, এটা না, ওটা দাও—এসব শেখাতে যেয়ো না । বল—আমি দীন, তুমি দীননাথ, আমি কিছু জানিনি, কিছু চাইনি, এ দেহ তোমার, এ প্রাণ তোমার, আমি তোমার, আমার আমি নেই, সবই তুমি, তুমি যা ভালবুঝ তাই কর, তা হলেই আমার ভাল ।

রঙ্গ । এ সব বড় তত্ত্বজ্ঞানের কথা মা ? আগে যতদূর সাধা নিজে বেয়ে চেয়ে দেখি—তারপর ত ভগবানের ওপর ভার দেওয়া আছেই ।

বাস । বুঝেছি বাবা, তুমি আমার দীননাথকে ধরে রাখতে পারলে না । আমি অবোধ মেয়ে বলে, আমার কথা শুনচো না ; আজ যদি আমার একটা মা থাকতেন, তা' হলে তিনি তোমার হাত ধরে টেনে নিয়ে দীননাথের দ্বারে দাঁড় করিয়ে দিতেন । মার কথাত আর ঠেলতে পারতেন না ! হ্যাঁ বাবা, যদি আমি একটা বাবা পেলুম, তবে একটা মা পেলুম না কেন ?

রত্ন । একথা তোমার দীননাথকে জিজ্ঞাসা করনা কেন ?

বাস । করি ত ; তা তিনি বলেন—তোমার মা আছে । হ্যাঁ বাবা, দীননাথের কথাত মিথ্যা নয়, কোথায় আমার মা আছেন ?

রত্ন । কি জানি মা ? ( ব্যস্তভাবে ) যাও মা, ঐ কাশিম আসছে !

বাস । ( সভয়ে ) ও বাবা—সেই সেই, আমার বড় ভয় করে ! আমি তোমার কাছে থাকি বাবা, তা' হ'লে আর কোন ভয় থাকবে না ।

রত্ন । না মা, বাড়ীর ভেতর যাও । তোমার দীননাথ তোমার রক্ষা করবেন ।

[ বাসন্তীর প্রস্থান ।

রত্ন । ( স্বগত ) মায়াময়ী আমার ক্রমে জড়িয়ে ফেলছে দেখছি । আর একা আমার আদরে ওর তৃপ্তি হয় না, মা খুঁজ্চে ! লক্ষ্মী, কেন তোর পিতা রাজারামের পক্ষ অবলম্বন করলে ? নইলে আজ ত তুই বালিকাকে মাতৃস্নেহে ভরিয়ে দিতে পারতিস্ । বলবি, তোর দোষ কি ? দোষ—মহাদোষ, রঘুজীর কন্যা— তাই তুই দোষী !

[ কাশিমের প্রবেশ ]

কাশিম । আদাব রাজা সাহেব, আপনি কার সঙ্গে কথা কচ্ছিলেন, আমার আস্তে দেখে পালিয়ে গেল ?

রত্ন । ওটি অনাপিনী ক্ষত্রিকন্যা ; বাল্যাবধি আমার কাছেই আছে, আমার পিতা বলে সম্বোধন করে ।

কাশি । বটে ! বিবিটিকে বড় খুপ্সুরৎ বলে বোধ হ'ল । মনে করলে আপনি ওকে খুব বড় আমীর ওমরাহের বিবি করে দিতে পারেন । আপনার উপর আমার খুব মেহেরবাণী আছে । আপনি কাকের হ'লেও আপনাকে আমি দোস্ত্ মনে করি ।

রঙ্গ । হঁ—

কাশি । ভাবছেন কি রাজা সাহেব, খবর শুনেছেন ?

রঙ্গ । কি ?

কাশি । একটা বড় গণ্ডার ঘাল করা গেছে ! রঘুজীকে জানতেন্ ?  
জামগীরদার রঘুজী ?

রঙ্গ । এঁ্যা-এঁ্যা, তা জানি—জানি, জানতাম—হাঁ-হাঁ—নাম শুনেছি ;  
তার কি হলো ?

কাশি । একদম কোতল ; নিজের হাতে, বিস্তর দৌলত লোটা গেছে ।  
কিন্তু আসল দৌলত হাতছাড়া হয়ে গেল । আপশোষ করুন রাজা  
সাহেব, আপশোষ করুন !

রঙ্গ । রঘুজী শেষ এই রকমে মারা গেল ! তার পরিবারবর্গের  
কি দশা হলো ?

কাশি । ভয় নেই—ভয় নেই রাজা সাহেব । কাশিম সাহেব বড়  
রহমদেল, রঘুজীর লেড়কা, কবিলা কাকেও সে রেখে আসেনি ; সব দৌলকে  
পাঠিয়ে দিয়ে এসেছি, নরক গুলজার হচ্ছে ! মোদা আসল দৌলত  
হাতছাড়া হ'ল ! আপশোষ কর দোস্ত, আমার জন্তু আপশোষ কর ।

রঙ্গ । রঘুজীর একটা কন্যা ছিল না ?

কাশি । তাইত বলছি দোস্ত, বিবি যেন পরিচ ছবি ! পেয়েও  
পেলুম না ! অমন বিবিকে আমার দপ্তরখানা বিছিয়ে পেশোয়ারী  
পোলাও, কাবুলি কোণ্ডা খাওয়াতে পারলুম না ! সেই নীলার মত আঁধি  
ছটীকে নিজের হাতে সূর্য্য পরাতে পারলুম না ! তার তুলতুলে পা ছখানি  
কোলে তুলে, তাতে হেনা মাখাতে পারলুম না ! আপশোষ !

রঙ্গ । ( স্বগত ) জগদীশ্বর, ধৈর্য্য দাও ; দারুণ রাজ্যলিপ্সা ! নইলে  
এখনও ছদ্মনের বন্ধ, পদাঘাতে চূর্ণ কচ্চিনে !

কাশি । হার হার, বেহেশ্তের হার হাতে পেয়েও হারালুম ! অমন চেহারার ভেতর অত শয়তানী থাকে, তা কে জানে ?

রঙ্গ । কেন, কি হল ?

কাশি । শোভন আল্লা, যেমন 'মেরে জান, মেরে পেয়ার,' বলে আমি সামনে গেছি, অমনি কুর্তির ভেতর থেকে এক ছোরা না বার করে, এমনি আমার দিকে তেড়ে এলো যে সেই খোলা চুল, রাস্তা চোখ, আর ছোরার ফলক দেখে, আমার হাতের তরোয়াল হাত থেকে খসে পড়লো ! আর আমি অমনি পেছন ফিরে ছুট দিলুম । ছুট দিলুম, দোস্তু, ছুট দিলুম ; একটা আওরতের সামনে আমি কাশিম খাঁ বাহাদুর বোঁ বোঁ করে ছুট দিলুম !

রঙ্গ । ( স্বগত ) ধন্য ঈগদীশ্বর, কাপুরুষ পতির স্ত্রীকে বাসন্তীর দীননাথ রক্ষা করেছেন !

কাশি । কি ভাব্ছো দোস্তু ?

রঙ্গ । সর্দার বাহাদুর, হঠাৎ আমার মাথাটা ধরে উঠলো ; আপনি যদি মাপ করেন ত আমি একটু বিশ্রাম করি ।

কাশি । আচ্ছা, আমারও দুনিয়া বড় কালা মালুম হচ্ছে । সেস ভর সিরাজী না খেলে আর সে সোনার বিবিকে সহজে ভুলতে পার্বোনা । আদাব । [ প্রস্থান ।

রঙ্গ । কি করি ? রাজ্যলালসার জলাঞ্জলি দিয়ে লক্ষ্মীর অনুসন্ধানে বেরুব না কি ? না, কেনই বা তা করবো । সে আমার কে ? তাকে তো আমি ত্যাগ করেছি । তার চেহারা পর্যন্ত আমার মনে নাই । আমাকেই কি তার মনে আছে ? অসম্ভব ! সেই কতদিন হ'ল গোটাকতক মস্তুর পড়া হয়েছিল বইত নয় । তার জন্য আমার আবার মায়া কি ? কিন্তু তবু প্রাণ এমন করে কেন ? যাকে চিনিনি,

প্রথম অঙ্ক ]

বীরপূজা

[ তৃতীয় দৃশ্য

জানিনি, তার জন্তু প্রাণ এমন করে কেন? তবে কি সে আমার ভালবাসে? স্বামী ত্যাগ করলেও কি স্ত্রী তাকে ভোলে না? নইলে কেন সে কাশিমকে ছুরি মারতে গেলো; কার জন্তু সে পালান; কার জন্তু সে পথের কাঙালিনী হ'ল?

[ প্রস্থান।

## তৃতীয় দৃশ্য।

ভীমা তীর।

জনৈক মারাঠী-সৈন্য চুল শুখাইতেছে।

পশ্চাৎ হইতে গোবর্দ্ধনের প্রবেশ।

গোবর্দ্ধন।

গীত।

তোড় জোড় আমার জমিদারী।

যে রাজার রাজা মহারাজা তার চাকরী করা কি

ঝক্কারী ॥

আমি শেঠের বাছা ষষ্ঠীর দাস,

ধাক্কা সূখে বার মাস,

এই গাছ তলাতে এইটী হাতে, ঠিক যেন সেই

বংশীধারী ।

আমি ভোগের মালাই ভোগটী জানি,

ধরি মাছ আর না ছুঁই পানি,

কেউ পারবেনা আর কভে আমার এই খাসতালুকে

আইনজারি ॥

গোব । ( স্বগত ) পোড়ার বাংলা দেশে খালি গাঁজাপুরি গুজোব !  
লোকে বলে কিনা, কানীতে গেলে আর পেটের ভাবনা থাকে না ।  
পালে পালে সুন্দরী এসে খুব ভোয়াজ ক'রে, ক'সে রাবড়ী মালাই  
খাওয়ায়, আর আদর করে চাঁপা কুলের আঙ্গুল দিয়ে চেংগজের  
চতুরীর দোকানের টাকা টাকা সেরের তামাক আপনি তাতে সেজে  
দেয় । ও মা, কানী গিয়ে দেখি সব ভূয়ো ! কোথায়ই বা রাবড়ী মালাই,  
কোথায়ই বা মেয়ে মানুষ ! এক বেটী দৈওয়ালী চোখ ঠেঁরে কথা  
কইত বটে, কিন্তু বেটীর আমার চেয়েও পাকা রং ; যতদূর ষটুকে  
মুখস্থ ছিল, মনে মনে আউড়ে দেখলুম, তাতেও বেটীর বয়স কুলোর না ।  
আর গায়ের সেই ধুকড়ীর কি দুর্গন্ধ ! রাম, রাম, বিশ্বনাথ বেঁচে থাকুন,  
কানীর পায়ে নমস্কার ! এলুম বন্দাবন ; ভালুম মহাপ্রভুর কৃপায় মাল্পো,  
মধুকরী, সেবা-দাসী—এগুলো তো মিলবে ? আ সর্কনাশ ! মধুকরী  
যানে দোর দোর ভিক্ষে ! আর সেবাদাসী ? বেটীদের বয়সের গাছ  
পাথর নেই, তার ওপর আবার চুল কপ্চান, এক এক শাকীর মাথায়  
টিকী ! থাক রাখারানী, তোমার বন্দাবন নিয়ে তুমি থাক, আমার  
ছুটা দাও—বলেই প্রস্থান । এবার এসেছি এই বর্গীর দেশে ; দেখি

কান্দালী বাঙ্গালী এখানে কি ছাব পায় । ( মুক্তকেশ সৈন্তকে দেখিয়া )  
 “বামে শব শিবা কুম্ভ” প্রথমেই শুভ যাত্রা ! আঃ মরি মরি ! কি  
 চুলের বাহার ! এই বেলা কেউ নেই, আলাপটা করে ফেলা  
 যাক ! ( কাছে গিয়া প্রকাশ্যে গলা খেঁকারি দিয়া ) বলি ছঁ ছঁ, ছঁ  
 ছঁ, শুন্‌চো ? হাঁগা, ও পিয় শশী ; চেয়েই দেখ ! বলি, ও দেখন্থাসি,  
 এলোকেশী —

মা-সৈ । ( সচকিতে ) কোন্‌ ছায়েরে ?

গোব । ( ভয় পাইয়া ) এঁা একি, একি বাবা ! দাড়ী যে !  
 এ যে চুলের চেয়েও লম্বা বাবা !

মা-সৈ । তোম্‌ কোন্‌ ছায়, হিঁরা কেয়া কর্তা ছায় ?

গোব । অবাক হো গিয়া ছায় । তোম্‌কো আপ্‌কো এলোকেশ  
 দেখ্‌কে পাগল হো গিয়াথা ; কিন্তু বিধুমুখমে গোঁফ দাড়ী দেখ্‌কে একদম্  
 থম্‌কে গিয়া, মুখসে বাক্‌ সরতা নেহি ।

মা-সৈ । বোলো জল্‌দি তোম্‌ কোন্‌ ছায় ?

গোব । হাম্‌তো গোবর্দ্ধন ছায়, কিন্তু তোম্‌ কোন্‌ ছায়, মন্দা ছায়,  
 না মাদি ছায় ? আপ্‌কো বিধুমুখী বলেগা, না পাঁড়েজী বলেগা ?

মা-সৈ । তোম্‌ কেয়া, পাগল ছয়া ছায় ?

গোব । মারপেট থেকে পড়কে নেহি থা ; কিন্তু পশ্চাৎভাগমে  
 আপকো চাঁচর চিকুর দেখকে, কুচ কুচ পাগল ছয়াথা । তারপর  
 তৎক্ষণাৎ আপ্‌ ঘুরকে দাঁড়াতেই, চাঁদ মুখকা এই তাজ্জব ব্যাপার  
 দেখকে, একদম পাগলা গারদ জানেকা উপযুক্ত ছয়া ছায় !

মা-সৈ । তোমারা ঘর কাঁহা ?

গোব । ঝাঁকড়দা মাকড়দা জান্তা ?

মা-সৈ । নেহি, কোন্‌ জিলা ? ঝাপড়া মাপড়া কোন্‌ জিলামে ছায় ?



গোব । জিলা নেই, জিলা নেই, বাংলা মলুক জান্তা ?

মা-সৈ । হাঁ, হাঁ—বাংলা মলুক্কা নাম শুনা হয়। হুঁয়াকা আদমি সব চাউল্কা ভাত খাতা হয়, চিঃড়ি মচ্ছি খাতা হয়।

গোব । হাঁ, হাম্ লোক তো চাউল্কা ভাত খাতা হয়, তোম্ লোক কি কাঁঠালি কলাকা ভাত খাতা হয় ?

মা-সৈ । কেয়া ?

গোব । আর কেয়া ? আচ্চা এলোকেশী জি, যদি কিছু মনে না কর্তা ত একটা কথা জিজ্ঞাসা কর্তা।

মা-সৈ । বোলো।

গোব । আপু বিষয় কর্ম্ম কেয়া কর্তা ?

মা-সৈ । কেয়া ?

গোব । কেয়া কাম কর্কে আপ্কে দক্ষিণ হস্তকা ব্যাপার চল্তা ?

মা-সৈ । হাম্ সিপাহী হায়, জগী।

গোব । জগ্গী তাত আগাপাছতলা জগ্গল দেখ্কেই বুঝতে পার্তা ; কিছু কাম কেয়া কর্তা ? পেট ভর্গা কেমন ক'রে ?

মা-সৈ । আরে খানেকা ভাওনা কেয়া ?

গোব । বটে ! তা হাম্কে কিছু বন্দোবস্ত কর্ দেনে পার্তা ?

মা-সৈ । হামেরা সাপ আও ; গুলি চালাও গে।

গোব । তা উস্মে হাম্ সিদ্ধপুরুষ হায়। এক আসনে বস্কে হাম্ ছ' তিন ঘণ্টা অনবরত গুলি চালানে সক্তা।

মা-সৈ । তবত তোম্ বাহাদুর হায়।

গোব । হাঁ, দেশকে আড্ডামে আমার নাম রাজা খা। তা বিধুমুখীজি, আমার বড় ক্ষিদে পায় হয়, এদিকে হাইও উঠ্তা, হাম্কে শিগুগির শিগুগির কুচ খাওয়াও।

মা-সৈ। চলো, খানা পিনাকো বাদ আজই কুচ করেন্ণে ; তুম্ভি সাথ যাওগে।

গোব। কোথা মে ?

মা-সৈ। লড়াই মে।

গোব। লড়াই !

মা-সৈ। হাঁ, ছ'য়া যেতনা খুসি গুলি চালাও।

গোব। এ দেশমে আড্ডাকে কি লড়াই বোলতা হায় ?

মা-সৈ। হাম্ তোম্কে কাওরাজ কসরৎ সব সমজ দেঙ্গে।

গোব। ও গুলিকা কসরত হাম্ খুব জান্তা হায়। কাশীমে হাতী ফটক্কা আড্ডামে, হাম্ একদিন বাজি রাখ্কে দমমারা, আয় যেমা ফুঁ দিয়া, অমনি রগরগে লাল গুলি দশ হাত তফাতে মে ছিটকার পড়া।

মা-সৈ। বারে বাহাদুর ! কাল্কা লড়াই মে হাম্ তোম্কে বন্দুক দেগা, যেতনা খুসি গুলি চালাও।

গোব। বন্দুক কি হোগা, হাম্কে তোড়ছোড় হায়।

মা-সৈ। লেকেন্, তোম্কে মুলুক্কা ঠিকানা হাম্কে লিখ্ দে যাইও।

গোব। কাহে ?

মা-সৈ। আরে ভাই, লড়াইকে বাত কোন্ কহনে সক্তা ? তোম গুলি চালাওগে, ছ'মন ত তি চুপ চাপ খাড়া রহেগা' নেছি, ও তি তো তোমরা গর্দান লে সক্তা ?

গোব। ক্যা বোলতা ? আড্ডামে কি মারামারি হোতা ; মাতাল ডুক্তা ?

মা-সৈ। আরে মাতোরারা ত হোতাই হায় ; ও রোজ হাম্ বারশো আদমী খেমাসে নিকলা, চারশো কা উপর মরদানমে ছোড় আয়া।

গোব । এমন নেশা ছয়া—বুঁদ হো গিয়া ?

মা-সৈ । তাও কেয়া, লড়তে লড়তে জান্ দিয়া, উস্কো জান্ খালাস হো গিয়া ।

গোব । খালাস কা—প্রসব ? জোয়ান প্রসব হোতা ? তাজ্জব তোমেরা দেশ বাবা ! দাড়ি বি চোম্বাতি, এলোকেশ বি দোলাতি, আবার খালাস বি হোতা ?

মা-সৈ । নেইত ক্যা ? লেকেন্ ঠিকানা দে যাইও, আগর লড়াই মে মারা যাওগে তো তোমরা ঘরমে চিঠি ভেজেঙ্গে ।

গোব । মারা যাগা কেয়া ?

মা-সৈ । এক লড়াইমে না মরেগা, দুস্বে লড়াইমে ত যানে হোগা ।

গোব । কি এমন মাথার দিবিয়া দেওয়া হয় । তোম্ কোন্ লড়াই বোলতা ? যুদ্ধু ?

মা-সৈ । নেইত—আউর ক্যা ?

গোব । হামেরা চৌদ্দ পুরুষ কখন যুদ্ধু কিয়া নেই । হাম্কে কি কাটখোটা পায়া ? হাম্ ছাতু খাতা ? হাম্ সৌখিন বাজালী হয়, ললিত লবঙ্গলতা হয়, দাদখানি চাল্কা ভাত খাতা হয় !

মা-সৈ । আভি আও, তিন পছর বাদ কুচ করনে হোগা ।

গোব । না দাদা, হাম্ ছুট মারেগা ।

মা-সৈ । ক্যা মারে গা ?

গোব । ছুট—ছুট—চম্পট !

মা-সৈ । কেয়া, তোম্ ভাগেগা ?

গোব । নাইত কি করেগা ? মরণে হাম্ পারেগা নাই ।

মা-সৈ । তব্ কাছে হিঁয়া আয়া ?

গোব । দক্ষিণে মেয়ে মানুষ, বোম্বাই আঁব, এই সব আকর্ষণ মে

আয়া। আবার তোম্ বি গুলিকা লোভ দেখায়া। পরিষ্কার কর্কে ত প্রথমে বোলা নাই যে মানুষ মারণেকা গুলি।

মা-সৈ। তব্ আভি কেয়া করেগা ?

গোব। কি আর করবো দাদা, সন্ন্যাসী হোগা, মেয়ে মানুষকে ছেলে হবার, আর পুরুষ মানুষকে জোয়ান হবার ওষুদ দেগা।

মা-সৈ। আচ্ছা, তোম্ হামরা ঘর চলো, হাম্ তোম্কে জোয়ান বানায় দেগা !

গোব। কি—তোম্ জোয়ান করণেকা ওষুদ জাস্তা ?

মা-সৈ। দাওয়া নেহি, মস্ত মে।

গোব। এমন মস্ত ছায় ?

মা-সৈ। ছায় নেহি ?

গোব। আচ্ছা যা থাকে কপালে, করো হাম্কে জোয়ান। সতি কথা বলতে কি টাচর চিকুরজী, এই যে টুস্কি মাল্লেই পড়ে যাতা ছায়, আর মরবার আগে দশবার মরে যাতা ছায়, এতে সময় সময় মন্মে বড় লজ্জা হোতা। তুমি মস্ত পড়্কে, আমাকে জোয়ান কর।

মা-সৈ। এই দেখো, হামেরা সাত বাত কর্তেই তোমরা আগেসে ছাতি পুরা হয় ! আও হামরা সাণ্ ! ( গমনকালে ) আজ আউর এক ছব্লা বল পায়া—আজ আউর এক ছব্লা বল পায়া ! [ উভয়ের প্রস্থান।

[ রাজারাম ও সৈন্য সামন্তের প্রবেশ।

জনৈক ভৃত্যের প্রবেশ। ]

ভৃত্য। রাজা রত্ননাথের দূত আপনার দর্শনপ্রার্থী।

রাজা। আচ্ছা, নিরে এসো। ( ভৃত্যের প্রস্থান ) এই সেই বিস্ফোটক ; মারাঅক নয় বটে, কিন্তু বড় জালা দেয় !

## [ দূতের প্রবেশ ]

আপনি রঙ্গনাথের কাছ থেকে আসছেন ?

দূত । আমি দিনতানয়ার মালিক, শাহান সা বাদসাহ আলমগীরের গোলাম আমীর উল্লেখ বেসেন্দার, দোতাজার মনসব্দার সেনাপতি সাহেব জঙ্গী বাহাদুরের পদাশ্রিত গোলাম কি গোলাম রাজা সাহেব রঙ্গনাথের ওরফ হ'তে আপনার কাছে এসেছি ।

রাজা । অত ভয় প্রায় কাজ কি ? প্রয়োজন বল ?

দূত । রাজা রঙ্গনাথের রাজা আপনারা কেড়ে নিয়েছেন বলে তিনি বাদসাহের গোলাম সেনাপতি বাহাদুরের কদমপোষে পড়ে বীরপুরুষের মত কাঁদছেন । রঙ্গনাথ সেনাপতি সাহেব ঠাই মেহেরবাণী করে আমায় এখানে পাঠিয়েছেন । আমিও বহু প্রনায়েৎসে দিল্লীর দৌলতখানা ছেড়ে আপনাদের এই গরীবখানায় এসে জানাচ্ছি যে, যদি এখনই আপনারা রাজা সাহেবের রাজ্য ছেড়ে না দেন, তবে বাদশাহি ফৌজ এসে আপনাদের জোয়ান বাচ্ছা বুড়া আওরং সব একদমসে কোতল করবে, দুনিয়া থেকে মারাঠীর নাম খারিজ হয়ে যাবে ।

রাজা । মারাঠীর নাম খারিজ করা সেনাপতি বাহাদুরের অথবা তাঁর সন্ত্রাস্টের পক্ষে বড় সোজা নয়, বোধ হয় তাঁরা তা বুঝে থাকবেন । দূত ! সেনাপতিকে মনে করে দিও, যে অসির পরিচয় তিনি পূর্বে পেয়েছেন তার ধার আরও খরতর হয়েছে । ( অসি নিফাসন )

দূত । ( ভীত চক্কা দূরে গিয়া ) থাক্ থাক্, দূত অবধা, গোলেন্ডায় আছে, রাম ভারতে আছে ।

রাজা । ভয় নেই, মশকনাথের নিমিত্ত মারাঠীর অসি নিফাসিত হয় নি । দূত ! তোমার দাস্তিক বাদশাহকে বোলো যে হিন্দুস্থানের লোহার

চমৎকার ইম্পাত হয়। আর করালী মন্দিরের যে খড়্গে ছাগবলি হয়, সে খড়্গে নরবলিও হয়ে থাকে। অসির আশ্ফালন আর যেন তিনি না করেন। যদি এই মহারাষ্ট্রে দেশকে বলিদানের প্রাক্ষণে পরিণত দেখতে তাঁর বিশেষ অভিলাষ হয়, তবে যেমন অত্যাচার চল্চে, তেমনি চল্চে দিন। আমরাও শ্মশানেশ্বরী করালীর ষোড়শ উপচারে পূজার ব্যবস্থা করি। মন্ত্রী, যাও, দূতকে পুরস্কার দিয়ে বিদায় দাও। (প্রস্থানোত্ত)

দূত। আজ্ঞা, বলেছি ত দূত অবধা ?

রাজা। ভয় নেই, আমাদের রাজনৈতিক অভিধানে ভাষার ভোজ-বাজী নাই। পুরস্কারের মানে পুরস্কার,—দূতের তা সর্বত্রই প্রাপ্য।

[ জনৈক সামন্তের সহিত দূতের প্রস্থান।

রাজা। বহুগণ, ভ্রাতৃগণ, মহারাষ্ট্রের বীরপুত্রগণ! আজ কেন আমরা এখানে সমবেত হয়েছি জান ? মোগলের পাশব অত্যাচারে আজ ভারতের সীমা হতে সীমাস্তর জর্জরিত ; দাক্ষিণাত্যের ঘরে ঘরে হাহাকার, সতীর দীর্ঘশ্বাসে, বালকের করুণ ক্রন্দনে, বৃদ্ধের মন্যভেদী শোকোচ্ছ্বাসে আজ ধনজনপূর্ণ দাক্ষিণাত্যে শ্মশানের করাল ছায়া! তাই আমরা করালবদনা শ্মশানবাসিনীর পূজার অনুষ্ঠান করব। শ্মশানে শ্মশানপ্রিয়ার পূজা; সে পূজার উপচার আত্মত্যাগ, সে পূজার মহামন্ত্র খরখড়্গের বিপুল ঝঙ্কার, সে পূজার মহাফল মানবের চির আকাঙ্ক্ষিত মুক্তি! দেখ, কে কোথায় দুর্বল অশক্ত অত্যাচারপীড়িত আছে, দেখ কে কোথায় মরণভয়ে ভীত কাপুরুষ আছে,—আত্মহৃদয়গত মন্ত্রবলে সকলের হৃদয়কে বলীয়ান কর। সকলকে শিখাও, মুক্তি ভোগে নয়—বিলাসে নয়—কাপুরুষোচিত পশুজীবনধারণে নয়—মুক্তি ত্যাগে, মুক্তি আত্মদানে, মুক্তি স্বধর্মের জগু জীবনবিসর্জনে! জয় মা অষ্টভূজা!

সকলে। জয় মা অষ্টভূজা!

[ সকলের প্রস্থান।

## [ লক্ষ্মীবাইএর প্রবেশ ]

লক্ষ্মী। (স্বগত) একা; এই বিপুল জনস্রোত—এই অবিরাম চাকলা—এই মর্ষভেদী কোলাহলের মধ্যে আমি একা। এই বিশ্বসংসারের কার্যকারণের অনন্ত শৃঙ্খলে আমি একটি ক্ষুদ্র বলয়। কে আমার লক্ষ্য করে? সংসারের সম্পর্ক-বিহীনা এই একাকিনীর প্রতি কে লক্ষ্য করে! না—না, তাই বা কেন? যার ইচ্ছা বাতীত একটি বৃক্ষপত্রও শাখাচূত হয় না—তার লক্ষ্য ত আমার প্রতি আছে! নইলে সেদিনকার সেই পিলাচের পাশব কবল হ'তে কে আমার রক্ষা করলে? মা মহাশক্তি, আমার অস্তুরে বিরাজ কর মা। তোমার মঙ্গলময় শক্তিতে, তোমার অজস্র প্রবাহিত করুণায়, এ প্রাণের বিশ্বাস যেন অটল থাকে। তা হ'লেই আমার উদ্দেশ্য সিদ্ধ হবে; আমি আমার স্বামীকে পাব!

## [ গোবর্দ্ধনের প্রবেশ ]

গোব। রাম রাম ভাই; না, এয়ে আবার লম্বাচুল দেখছি! বলি ভায়া, তুমিও ত আমাদের সঙ্গে আজ ঐ কুচ না কচু—তা করবে তো?

লক্ষ্মী। তুমি কি আমার পুরুষ মনে করেছো?

গোব। বিলক্ষণ মনে করেছি; আর কি ঠিক? তোমার দাড়ি গেল কোথায় কঠা? আজও গজাঘনি, না কামিয়ে ফেলেছ?

লক্ষ্মী। আমি স্ত্রীলোক, দেখতে পাচ্ছ না?

গোব। চোক্কে আর বিশ্বাস করি কেমন ক'রে বল দাদা? অনেক বাচ্ছা বর্গাও দেখলুম—তোমারই মত মুখ মাজা আর পিঠজোড়া চুল। তবে একটা ধোঁকা লাগছে বটে; তোমার চোখ দুটো তত খাই খাই কচ্ছে না। যেন কাল তারা দুটোর ভেতর একটু মায়া আর লজ্জা মাধান

আছে। তা তুমি যদি মেয়েমানুষই হও তা' হ'লে এখানে একলাটি কি কচ্ছ ? এখানে কি তোমার কেউ আছে ?

লক্ষ্মী। আমার কেউ নেই, আমি সন্ন্যাসিনী।

গোব। ভায় হায়, আমিও সন্ন্যাসী হ'ব মনে করেছিলুম ; এখন আর তা ইচ্ছে করে না ভাই ! একবার এদের সঙ্গে মিশে যুদ্ধ করাটা দেখে আসি। মনে বড় দিক্কার জন্মেছে দিদি ! তোমায় দিদি বল্বে— রাগ ক'র্বে না তো ?

লক্ষ্মী। না বেশত—বল না, আমারও ভাই নেই, তুমি ভাই হ'লে।

গোব। মাইরি দিদি, তোমায় কথাগুলি বড় মিষ্টি ! হাঁ, যা বল্ছিলুম, বড় দিক্কার জন্মেছে ভাই ; একে ত ভেতো বাঙ্গালী ; তাতে আমার একটু মোতাও অভ্যাস আছে। যে সে শালা এসে ছমকি দেয়, আর ধাক্কা দেবার আগেই আছাড় খেয়ে পড়ে যাই—তাই মনে ক'রেছি যা থাকে কপালে, এই এদের দলে থেকে, একটু খাওয়া দাওয়া করে বুক বলটা করে ফেলি !

লক্ষ্মী। বেশ, আমিও তোমার জন্তু ঈশ্বরকে ডাকবো। কিন্তু ভাই, কখনও নিজের জন্তু কিছু ক'রো না, লড়াই ক'র্বে মায়ের জন্তু।

গোব। আর দিদি, এমন কুপুতুর জন্মেছিলুম যে কখনও দশমীর দিন একমুঠো মুড়ি এনে জল খাওয়াতে পারিনি। মা কি আর আছে দিদি ?

লক্ষ্মী। তোমার গর্ভধারিণী গিয়েছেন, কিন্তু আরো মা আছেন ত ? যিনি তোমার আমার সবার মা !

গোব। কে, মা ছর্গা ? ওঃ, সে বেটী নিজেই দশহাতে লড়াই ক'রে, আমার আর তার জন্তু লড়তে হবে না।

লক্ষ্মী। আর তোমার দেশ তোমার মা নয় ?

গোব। দেশ, কি কাঁকড়মা মাকড়মা ?



লক্ষ্মী । ই্যা তাও ; তার ওপর তোমার বাংলাদেশ, আমাদের এই মহারাষ্ট্র !

গোব । এই দেখছি দিদি পাগলামি আরম্ভ করে ! দেশ মা কিরে ?

লক্ষ্মী । মা নয় ! তোমার গর্ভদারিণী মার কোলে গুরে গুরে মানুষ হয়েছ ; বুক থেকে দুধ টেনে টেনে পেয়ে বড় হয়েছ ; তাইত মাকে ভালবাসতে ? সে মা নেই, এখন কার কোলে শোও ?

গোব । ছর পাগলি, বুড়ো মিন্‌সে কোলে শোব কি ! একটা চেটাই ফেটাই যা পাই টেনে নি, নইলে মাটিতেই গা ঢেলে দি ।

লক্ষ্মী । মাটি কোপাকার—দেশের ত ? তা হ'লে দেশের কোলে শোও না ? চেটা ও না জুটতে পারে ; কিন্তু দেশের মাটি তোমার জন্ম কোল পেতেই রেখেছে !

গোব । তাও তো বটে ! দিদি, তুই বলছিস্‌ মন্দ নয় !

লক্ষ্মী । তারপর মার দুধ ত কোন্‌ কালে ছেড়েছো, এখন পেট ভরাও কি দিয়ে ?

গোব । ডাল ভাত রুটি, আজ তো লাড্ডু খেয়েই কেটে গেল ; যখন যা জোটে ।

লক্ষ্মী । মার বৃকের রস যেমন দুধ হয়ে বেরুত, তেমনি এই দেশের বৃকের রস তোমার খাওয়ার জন্ম, ধান গম এই সব হ'য়ে বেরোয় না ? জন্মাবার পর দু এক বছর ত সে মার মাই টেনেছিলে—তারপর এককাল এ মার মাই টান্‌চো না ? এই ভারতের মাটি সারা জীবনটা তোমার কোলে ক'রে বঠেছে না !

গোব । ও দিদি, বেশত জলের মত বুঝিয়ে দিলি স্যাই ! মাইতো বটেবে ! কি বলবু আমি তার চেয়ে বয়সে বড়, নইলে পায়ের ধুলোটা নিয়ে ফেলতুম !

লক্ষ্মী । তুমি যে আমার দাদা, আমার প্রাণখুলে আশীর্বাদ কর ।

গোব । সন্ন্যাসিনীকে কি বলে আশীর্বাদ করতে হয় দিদি ?

লক্ষ্মী । বল যে আমার মার মুখ আবার যেন উজ্জ্বল হয় ।

গোব । তা আমি মন খুলে বল্চি—ব'ল্‌বো । কিন্তু দিদি মাতো চিনিয়ে দিলি, মার শত্রুটা চিনিয়ে দে ।

লক্ষ্মী । যাদের আশ্রয় নিয়েছ, ওরাই তোমাকে শত্রু চিনিয়ে দেবে । যাও ওদের সঙ্গে থাকগে, ওরা যা বলে তাই কোরো ।

গোব । তা তো যাবই, ঠাকুর ছুঁয়ে দিবি করেছি । কিন্তু দিদি তোমার মস্তুরের জোরও ত কম নয় ? তুই দেখ্‌ছি মানুষকে সিংগীও কর্তে পারিস্, পোষা কুকুরও কর্তে পারিস্ । তোকে ছেড়ে যেতেও যে মন চাচ্ছে না । হ্যাঁ দিদি, যদি এদের সঙ্গে যুক্ত ক'রে ক'রে বেড়াই, তা হ'লে তোমার দেখা আর কবে পাব ?

লক্ষ্মী । বোন বলে টান থাকেতো কখন না কখন দেখা হবেই ।

গোব । তা দিদি থাকবেই । আমরা নেশাখোর লোক—একটানা প্রাণ । গুলিতে হাড় কালি করেছে, তবু এমন টান যে তাকে ছাড়তে পারিনি । আবার তোমার মস্তুরের চোটে তোমার উপর এমন টান হ'ল যে দেখ্‌বে, যদি লড়াই করতে করতে বিদেশে বিভুঁয়ে মরি, তবে দিদি দিদি বল্‌তে বল্‌তে ম'র'ব ।

লক্ষ্মী । মা মা বোলো, সে মরণও সার্থক হবে ।

গোব । মা মাও বল্‌ব, দিদি দিদিও বল্‌ব ।

লক্ষ্মী । পাগল, কচ্ছি কি ? সন্ন্যাসিনীকে আমার জড়াস্নি ! পালা—  
পালা—

গোব । তোমার কিছু হানি করেছি নাকি দিদি ? তবে থাক্‌বো না,

পালাই—পালাই । দিদি তুই ভাল থাক, তোরা নাইতে যেন না মাথার  
কেশটি খসে, আমি পালানুম— [ প্রস্থান ।

লক্ষ্মী । ( স্বগত ) সার্থক আমার ব্রত গ্রহণ ! জননী জন্মভূমি,  
তোমার সেবার জন্ত, আজত একটি ভাইও পেলুম মা ? তবে কেন মিছে  
ভাবি ; ভেসেছি ত অকূল পাথারে—তারা, তুমিই পথ দেখিয়ে নিরে  
চল মা !

গীত ।

অবেলায় হাট ভান্জলি শ্যামা কি নিয়ে মা ঘরে ফিরি,  
( আমার ) যা ছিল সকলই গেছে, মিছে শুধু  
ঘুরে ঘুরি !

ভরা হাটের হেটো যারা,  
একে একে গেছে তারা,  
( আমি ) কর্মদোষে রইলুম বসে পাপের  
বোঝা শিরে ধরি ।

রবি যে বসছে পাটে,  
( আমি ) কি করি এই ভান্জা হাটে,  
নেমা কোলে তুলে অভাগীরে দে মা তোরা  
ঐ চরণতরী !

পটক্ষেপণ ।

# দ্বিতীয় অঙ্ক ।

## প্রথম দৃশ্য ।

কাশিম খাঁর উদ্যানপার্শ্ব ।

কাশিম ও রজনাত ।

রজনাত । আর উদাসীন থাকলে চলবে না ; সেনাপতি সাহেব, রায়গড়ে অসংখ্য বাদশাহীসৈন্য ক্ষয় হয়েছে !

কাশিম । দেল দোরস্ত্, নেই দোরস্ত্—কার জতে লড়্ ব ? কাশিমী না থাকলে কাঞ্চন কুঁড়িয়ে লাভ কি ? আগে কাশিমী, পরে কাঞ্চন । কেমন, ঠিক নয় ?

রজনাত । ওকি কথা বলছেন, সেনাপতি বাগদুর । এখন ও সব কামের কলুষ কথা ছেড়ে দিন । এই রণোন্মত্ত মারাঠা জাতির করাল রূপাণকে আর কৃষকের কাণ্ডে বলে উপেক্ষা করবেন না !

কাশিম । রায়সাহেব, আপনি কাফের কুসংস্কার এখনও ত্যাগ করতে পারেন না ! নিশ্চয় জানবেন, যখনই মনে করব, কাণ্ডে ধরব, আর ছুনিয়া শুক মারাঠাগুলোকে চলে পড়া ধানের মত একেবারে মুড়িয়ে কেটে ফেলব !

রজনাত । তবে আর বৃথা চেষ্টা, আপনার দ্বারা দেখছি আমার আর কোন আশা নেই । বাদশাহ আমার অনেক আশা দিয়েছিলেন । একবার তাঁর কাছে গিয়ে সকল কথা নিবেদন করি ।

কাশি। হাঃ হাঃ—ভুল, দোস্ত, ভুল ! আমরাই বাদশার চোখ, আমরাই বাদশার কান, আমরাই বাদশার জবান। আপনি বোধ হয় এখনও জানেন না যে বাদশার বিশ্বাস আপনার দোষেই এবার আমাদের পরাজয় হয়েছে।

রঙ্গ। সে কি সেনাপতি সাত্বে, আমার অপরাধ কি ! আমি যে তিন দিন তিন রাত্রি অনবরত যুদ্ধ করেছি।

কাশি। সব জানি, কিন্তু আপনার বীরত্বের বাখান করে কি আমি বাদশাই ফৌজের গৌরব নষ্ট করব ?

রঙ্গ। আপনি কি বলছেন ? তবে 'ক বাদশা আমার কথা বিশ্বাস করবেন না ?

কাশি। বিশ্বাস করা তাঁর উচিত নয় ; আমি সম্রাটের স্বজাতি, আপনি বিজাতি, আমি তাঁর স্বদর্শী, আপনি বিধর্শী, আমি রাজকর্মচারী, আপনি রাজদ্বারে ভিখারী, আমাদের উপর বিশ্বাস, আপনার উপর সন্দেহ, আমাদের হুকুম, আপনারা আতঙ্ক। বাদশাই তকের এই চারটি পায়া !

রঙ্গ। তবে কি আমার হুকুম গেল ?

কাশি। কাশিম সাত্বেকে অমুকুল রাখতে পারলে সব কুলই থাকে।

রঙ্গ। আর কি করলে আপনি অমুকুল হন ?

কাশি। এই বাকুলের প্রেমের মুকুলটি কুটিয়ে দিলেই—

রঙ্গ। ( সর্বিস্ময়ে ) আপনি কাকে কি বলছেন ? আমি আপনার প্রেমের মুকুল ফোটাব কি ?

কাশি। আপনি কি আর সশরীরে ফোটাবেন ? শেন কি আর লোক পেলুম না যে, আপনার সঙ্গে প্রেম করতে যাচ্ছি। আপনাকে ত আমি কতবার ইসারা ইঙ্গিতে বলেছি, কার জন্তু আপনার দোস্তের প্রাণ বাকুল।

রঙ্গ। কে, বাসন্তী ?

কাশি । হাঁ, এখন বাসন্তী—আবার আমার বেগম হলে বিবির খুব আমিরী নাম রাখবো ।

রঙ্গ । আপনি বলেন কি ?

কাশি । আপনি আশ্চর্য্য হতে পারেন । আমি সেনাপতি বাহাদুর, আপনার মত ভূমিশূণ্য কাফের রাজার কেনা বাদীর ওপর এত মেহেরবাণী কতে চাচ্ছি—একথা যে শুনবে সেই আশ্চর্য্য হবে ।

রঙ্গ । কেনা বাদী ! বাসন্তী যে আমার কণ্ঠা তুল্যা ; কাশিম সাহেব, আপনি তাকে জানেন না তাই এমন কথা বলছেন । সে যে আমার সেফালি ফুল, শিশির পাতে ঝরে যায় ; সে যে লজ্জাবতী লতা, ছায়াম্পর্শে মুদিত হয় ; অনাথিনী দীনা—দীননাথকে ডেকে দিন কাটায় !

কাশি । সে বসোরার গোলাপ—আপনারেয় সমভ্যতার অন্ধকারে রেখে তাকে বদরং করে ফেলেছেন । আমি তাকে আমাদের সমভ্যতার সূর্যালোকে এনে ফোটাব । সে গোলাপের খোসবো বাদশার রংমহল পর্য্যন্ত ছুটবে, তার রংএর জুলুসে শাজাদীদের পর্য্যন্ত চোখ ঝলসে যাবে ।

রঙ্গ । সেনাপতি বাহাদুর, এটা আমার ক্ষমা করুন ; ঐ মর্মান্তিকী কথাটা ছেড়ে দিন, বাসন্তীর বুক আমি স্বহস্তে ভেঙ্গে ফেলতে পারব না । আমি লালসার দাস বটে, কিন্তু সেই অনাথ্রাত বনকুম্ভটী আমি দেবার্চনার জগুও বৃষ্টিচাত কতে পারবো না । সেনাপতি সাহেব, সে কিছু জানে না । মানুষের ভাব, যুবতীর বৃত্তি তার প্রাণে নাই ; তার আশা নেই, ইচ্ছা নেই, সুখ নেই, দুঃখ নেই, ধর্ম্ম নেই, অধর্ম্ম নেই, বিলাস নেই, বেদনা নেই, সে নিজে নেই, তার নিজত্ব নেই, সব তার দীননাথকে দিয়েছে !

কাশি । কেয়াবাৎ খয়রাৎ, সবই ত দীননাথকে দিয়েছে—এখন বাকী আছে পরীর মত ছবিখানি, তা আর রেখে কি হবে, এই প্রাণ-নাথকেই দান করুক না ?

রঙ্গ । ( সরোষে ) বর্ষর ?

কাশি । ( উচ্চকণ্ঠে ) কি তাঁবেদার ?

রঙ্গ । কিছু না—আপনাকে কিছু বলিনি ; মন আমার চীৎকার করে ভেবে ফেলেছে !

( নেপথ্যে ) ইয়াপীর মওলা মুন্সল আসান ।

( নেপথ্যে ) চুপ্‌রাও বদমাস্ !

( নেপথ্যে ) জ্বান বন্দ করো ।

( নেপথ্যে ) শুন্‌রে শুন্‌রে দেল দেওয়ানা, বুটা জেন্দে‌কী মিছে বাহানা ! ইয়াপীর—

রঙ্গ । কিসের গোলমাল ?

[ মুন্সিলাসানবেশী গোবর্দ্ধনকে ধৃত করিয়া প্রত্নরিত্নয়ের প্রবেশ ]

১ প্র । হুজুর, একজন বদমাইস্ গোয়েন্দা ধরেছি ।

গোব । ইয়া পীর মওলা মুন্সল আসান, বাহা মুন্সল তাহা আসান ।

কাশিম । কে তুই ?

গোব । শা জুয়াপীর মনোবাঙ্ধা পূর্ণ করে ।

কাশি । চোপ্‌ চোপ্‌, এখানে কি কচ্ছিলি ?

গোব । আর কি করব বাবা, দরগার ফকির, ভিক্ষে করে পাঁচ দোরে ঘুরি ।

কাশি । তা আমার বাগানের ভেতর ঢুকছিলি কেন ?

গোব । তা রাজারাজড়া নবাব বাদশার বাড়ী না গিয়ে, ভিক্ষে কস্তে কি খেঁদীর মার বাড়ী যাব বাবা ?

রঙ্গ । ব্যাটা, তুই গুপ্তচর !

গোব । ( কাশিমের প্রতি ) একি বাবা, দীন হুনিয়ার মালিক বাদশা

আলমগীরের আমলে, মুসলমান ফকিরকে একটা কাফের গাল দেয়,  
দোহাই বাদশাজাদা, এটার বিচার করুন।

কাশি। আমি বাদশাজাদা নই।

গোব। ভুল হয়েছে বাপু—তুমি বাদশাজাদার বাবা সেই যে কি  
জাদা বলে মনে আসছে না, দিল্লার ফার্সী ব্যেদ এখনও সব মুখস্থ হয়নি  
বাবা!

কাশি। তোমার বাড়া কোথায়?

গোব। বাংলা মুলুক, চাটগাঁ বাদশা বাবা!

কাশি। তা অতদূর থেকে এখানে কেন?

গোব। আমি জাত ফকির নই বাবা, মনের দুঃখে মুস্কিল আসান  
কত্তে কত্তে বোরিয়ে পড়েছি।

কাশি। কি, দেশে যেতে পেরিসনে?

গোব। না বাদশা বাবা, পেটের দায়ে কটা লোক ফকির হয়?  
এই যে চেয়াক হাতে দোর দোর দুরন্ত হচ্ছে, এ বাবা খালি প্রেমের  
দায়ে—মেয়ে মানুষের হেঁপায় বাদশা বাবা?

কাশি। গরীবের ছেলে, আবার ও নেশা কেন?

গোব। সে যে সে মেয়েমানুষ নয় বাদশাবাবা। সে আমার সাদী  
করা বিবি, আমার বুকে ছিঁচুকে বিঁধে পালিয়েছে বাবা। সরমের কথা  
আর বলুক কি, বদনা আমার বড় গুপ্তস্বরূপ ছিল; হং যেন একেবারে  
কনুনের মত ধপ্ ধপে; চুল গোছাটো যেন মালিকপীরের চামর; অঙ্গ  
থেকে আপনা আপনি পাটনাই পাণ্ডের গন্ধ ফুটে বেরতো। কিন্তু  
বাবা, কাকের বাসায় ভীরেমন থাকবে কেন? ডানা গজাতেই উড়ে  
গেল! আমিও সেই থেকে মুস্কিলাসান হয়ে বোরিয়ে পড়েছি। এক  
জায়গার সুলুম, বদনা বিবি আমার দক্ষিণ মুলুকে বাই হয়েছে। তাই



এই দেশে এসে পাঁচজনের মৃত্যু আসান কচ্ছি, সঙ্গে সঙ্গে নিজের মৃত্যুর গোড়া খুঁজছি।

কাশি। তোমায় এখানে কেউ চেনে ?

গোব। বৌ পালায় দেওয়ানী ফকিরকে আর কে চিনবে বাবা ? তবে এই চাচা ( রক্তমাখকে দেখাইয়া ) চিনলেও চিন্তে পারে ?

রক্ত। আমি তোমায় চিন্তে পারি, সে 'ক ?

গোব। আরে চাচা, আমায় চেন না চেন, চর দেখলে ত চিন্তে পার ? তুমি ত চরের রাজা।

রক্ত। এ নিশ্চয় চর, বোধ হয় লুকায় আমাদের কথাবার্তা শুনেছে।

গোব। বোধ হয় কেন চাচা, স'তাই ত শুনেছি, মুসলমান কি সুটো কথা বলে ? কি বলব বাদশা বাবা, কসম দেখেছি যে বদনা বিবিয় নাক না কেটে, গোস্ট্ গ্রহণ করব না। নইলে যে দিন কাফের চাচার বেতীর সঙ্গে বাদশা বাবার নিচে হবে, সে দিন পেট ভরে কাণিয়া কাবাব্ খেয়ে, বাবার মুসলমান কর্তুম্। আতা, সে কি মেয়ে বাদশা বাবা, সে পরীর ছানা !

কাশি। তুমি কি থাকে দেখেছ ?

গোব। একদিন ঐ চাচার বাড়ী মুসলমান কতে গিয়ে দেখেছি বট কি বাবা ? বাদশার মরতী মালুম থাকলে, সেই দিনট পরীর ছানাটাকে কুলির ভেতর পূবে এখানে এনে ছাঁড়ির কর্তুম্।

কাশি। এ সব কাজও আসে না কি ?

গোব। বাদশা তুমি কলে সবট কতে পারি। যদি দয়া করে ঐ বাদশাট পাগোষে একটু আন্তানা দেন, তবে দেখে নেবেন এই চাটগেয়ে বাঙ্গালীর কত কেরামৎ।

কাশিম্। তোমার ভাল লোক বলেই বোধ হচ্ছে, তোমার সঙ্গে আমার দরকার আছে। এখন বাইরে অপেক্ষা করগে। (প্রহরিষয়ের প্রতি) এ লোক আমার কাছে থাকবে, কেউ ওকে কোন জুলুম্ কোরোনা।

গোর। (প্রস্থান কালে) ইয়া পীর মওলা—(প্রহরিষয়ের সহিত প্রস্থান)

রজ। লোকটা রং চং ক'রে আপনাকে খুসী ক'রে গেল; কিন্তু আমার বোধ হয় ও দুশ্মন।

কাশিম্। অন্ততঃ আপনার পক্ষে নয়। আপনার চীৎকার ক'রে ভাববার মুখে ও যদি না চঠাৎ এসে পড়ত, তাহলে বোধ হয় অন্য-মনস্কভাবে আমি তরোয়াল খুলে খেলা ক'রে ফেলতুম!

রজ। আপনার কি আমার ওপর এখনও ক্রোধ রয়েছে?

কাশিম্। ক্রোধের শাস্তি আপনার নিজেরই হাতে। আপাততঃ আপনি গৃহে যান। বেশ ক'রে ভেবে দেখুন; বাসস্তীর মায়ী পরিত্যাগ ক'রতে না পাল্লে আপনাকে যে কেবল সিংহাসনের আশা পরিত্যাগ করতে হবে—তা নয়, জীবনের আশা পর্য্যন্ত বিসর্জন দিতে হবে!

[ প্রস্থান।

রজ। (স্বগত) বিহ্বল সমস্তা—কি করি! জীবনসর্কষ বাসস্তীকেই বা ত্যাগ করব কেমন ক'রে, রাজ্যের আশাই বা ছাড়ব কোন প্রাণে? বড় কষ্ট, বড় কষ্ট! কি করি, কোথায় যাই!

[ প্রস্থান।

## দ্বিতীয় দৃশ্য ।

জেহানারার কক্ষ ।

জেহানারা উপবিষ্টা ।

[ খোজার প্রবেশ ]



খোজা । বাদশাজাদী—

জেহা । কি—বাদশাজাদী বলে কাঠের পুতুলের মত খাড়া রইলি কেন ? কি বলতে এসেছি বলা ?

খোজা । এক হিন্দু জেনানা—

জেহা । তাতে কি হয়েছে ?

খোজা । সে বড় জোর জবরদস্তি কচ্ছে ।

জেহা । কেন, তোর নকরা কেড়ে নেবার জন্তে ?

খোজা । আঞ্জে না ।

জেহা । তবে কি তোকে নিকা করবার জন্তে ? সে কি চায় ?

খোজা । রং-মহলে ঢুকতে চায় ।

জেহা । কি দরকার ?

খোজা । বলে বাদশাজাদীর কাছে বলবো ।

জেহা । সঙ্গে দোসরা আদমী আছে ?

খোজা । কেউ নেই, বড় খুপুসুরং চেচারা !

জেহা । সত্যি ?

খোজা । বেগম সাহেবের কাছে মিথ্যে বলে মাথা থাকবে না ।

জেহা । রং-মহল তাকে কে চিনয়ে দিলে ?

খোজা । বাদশার কোন ফৌজ ।

জেহা । নিয়ে আয় । [ খোজার প্রস্থান ।

( স্বগত ) দোষ কি ? যদি কোন নিরাশ্রয়া হয়, অনাধিনী হয়, যদি তার বাদশাজাদীর কাছে ভিক্ষা থাকে ? এলোই বা, তাতে ক্ষতি কি ? দেখি যদি তার কোন উপকার করতে পারি ।

[ লক্ষ্মীকাঠিয়ার প্রবেশ ]

খোজা ঠিক বলেছে, গুপ্তস্বরূপে বটে ! একপ রং রং-মহলে নেই, দিল্লী আগ্রায় নেই, বাদশার সাম্রাজ্যে আছে কিনা সন্দেহ ! ( প্রকাশ্যে )  
তুমি কি চাও ?

লক্ষ্মী । বাদশাজাদীর অনুগ্রহ—বাদশাজাদীর আশ্রয় !

জেহা । তুমি কি নিরাশ্রয়া ?

লক্ষ্মী । আমি নিরাশ্রয়া—অনাধিনী—মন্দভাগিনী ।

জেহা । তুমি যে আমার শত্রু নও—কেমন করে বুঝবো ?

লক্ষ্মী । বুঝবেন আমার মুখ দেখে, বুঝবেন আমার চোখ দেখে, আমার মন দেখে, আমার প্রাণ দেখে, আমার কার্যকলাপ দেখে—বাদীর অন্ত সুপারিশ নেই ।

জেহা । এক লহমাত্তেই কি চরিত্রের সমস্ত পরিচয় পাওয়া যায় ?

লক্ষ্মী । মেহেরবাণী করে আশ্রয় দিলে, দিনে দিনে, দণ্ডে দণ্ডে বুঝতে পারবেন ।

জেহা । ততদিন তোমার নিঃসংশয়ে মহালে স্থান দি কেমন করে ?

লক্ষ্মী । বাদশার মেয়ে, যিনি দণ্ডে দণ্ডে হাজার হাজার বাদী নফর গোলাম রাখছেন, ছাড়াচ্ছেন, তিনি মানুষের মন বুঝতে পারেন না !

মানব-হৃদয় তো তাঁর নখদর্পণে । তা যদি না হবে তবে ভগবান্ আমায়  
বাদশাজাদী না করে আপনাকে করেছেন কেন ?

জেহা । বুঝ্‌লুম্ তুমি সত্যভাষিনী, তোমার অকপট মুখমণ্ডলই  
তোমার সুরিজের পরিচয় প্রদান কচ্ছে । তোমার মুল্লুক কোথা ?

লক্ষ্মী । কর্ণাট ।

জেহা । কর্ণাট ! এত পথ তুমি এলে কেমন করে ?

লক্ষ্মী । কখন ডুলি, কখন দোলা, কখন অশ্বে, কখন পদব্রজে ।

জেহা । তোমার পিতামাতা আছেন ?

লক্ষ্মী । বেগম সাহেব, বাঁদী সে বিষয় নিশ্চিত হয়েছে ; আমার  
কেউ নাই ।

জেহা । স্বামী ?

লক্ষ্মী । আছেন ।

জেহা । তিনি তোমার রংমহলে আস্তে হুকুম দিলেন যে ?

লক্ষ্মী । আমি তাঁর হুকুম পাই নি—স্বৈচ্ছায় এসেছি ।

জেহা । তোমার স্বামী কোথায় ?

লক্ষ্মী । বাদশার দরবারে ।

জেহা । দিল্লীখরের দরবারে ! তাঁর নাম ?

লক্ষ্মী । ( বিনীত ভাবে নতমুখে ইতস্ততঃ করিয়া ) রঙ্গনাথ ।

জেহা । রঙ্গনাথ—রঙ্গনাথ । পরিচিত নাম, বাদশার মুখে আমি  
শুনেছি । তোমার মতলব কি ?

লক্ষ্মী । বাদশাজাদী, আমি ক্ষুদ্র, কিন্তু আমার মতলব ক্ষুদ্র নয় ।  
আমি ক্ষুদ্র খাল বিল হয়ে দরিয়া শোষণ করতে চাই ; আমি শশকী হয়ে  
মৃগেন্দ্র বশে আন্তে চাই ।

জেহা । তোমার কথা বুঝ্‌লুম্ না ।

লক্ষ্মী । বলেছি ত রঙ্গনাথ আমার স্বামী ।

জেহা । তারপর ?

লক্ষ্মী । স্বামী বাদীর প্রতি নারাজ ।

জেহা । তোমার মত রূপসীকে তিনি চান না ?

লক্ষ্মী । তিনি বাদীকে ভুলে গেছেন, বাদী তাঁকে ভুলতে পারেনি । তিনি বাদীর মূর্তি মন থেকে মুছে ফেলেছেন, আমি হৃদয়ে সিংহাসন পেতে, তাঁর প্রতিমা প্রতিষ্ঠা করে দিন রাত পূজা করি । বাদশাজাদি, বাদী তাঁর দেবতা যাতে পায়, এমন কি উপায় নেই ?

জেহা । রঙ্গনাথের কাজ বাদশার দরবারে, আমার রংমহলের বাদশাহীতে তাঁর কোন কাজ নেই ।

লক্ষ্মী । আপনি বাদশাহের সহোদরা !

জেহা । তাতে কি এসে যায় ?

লক্ষ্মী । শুনেছি বাদশার মত আপনার প্রতাপ, বাদশার মত সাম্রাজ্যের উপর আপনার অধিকার ।

জেহা । আমি অস্ত্রপুরবাসিনী, আমার হুকুম রংমহলে খাটে, দরবারে খাটবে কি ?

লক্ষ্মী । পৃথিবী রাষ্ট্র দিল্লীখর আপনার ইজিতে পরিচালিত ।

জেহা । রংমহলের কাজে আসতে পার, তোমার এমন কি গুণ আছে ?

লক্ষ্মী । আশ্রয় দিলেই জানতে পারবেন ।

জেহা । তোমার নাম কি ?

লক্ষ্মী । সরস্বাই ।

জেহা । তুমি গাইতে জান ?

লক্ষ্মী । সামান্ত ।

জেহা । আচ্ছা, একটা গাও । তোমার সঙ্গীত যদি আমাকে মুগ্ধ  
কতে পারে তাহলে রংমহলে অল্প কাজের দরকার হবে না ; একটা গাও ।

গীত ।

লক্ষ্মী ।

কি জানি কি দিয়ে বিধি গড়িল নারীহৃদয় ।

নিমেষের চোখে দেখা তাতেই বিকায়ে রয় ॥

জীবন যৌবন ধন,

অজানারে সমর্পণ,

ঝরে শুধু দুঃখন,

বৃথা পথ নীরিক্ষণ,

জানিনা কেমন ধারা, কোন দেশের এ বিনিময় ॥

জেহা । তোফা তোফা, সরয়ু, কেবল তোমার রূপই সুন্দর নয়—  
তোমার গুণও সুন্দর ! রূপে গুণে তুমি অসামান্য ! আমি ভেবেছিলুম  
তুমি শিমুল ফুল ; তা নয়—তুমি বসোরাই গোলাপ । আমি খুসী হয়েছি ।  
কই হার ?

[ জনৈক খোজার প্রবেশ ]

একে রংমহলের দারোগার কাছে নিয়ে যা । বুঝিয়ে দিবি, ইনি  
আমার মহলে থাকবেন ; হিন্দু-বেগম মহলে খাওয়া দাওয়া করবেন ;  
যেন এর কোন কষ্ট না হয় । বলবি, বাদশাহাদীর হুকুম ।

খোজা । হ্যাঁ হুকুম ।

জেহা । আর স্তাখু, রাজা রঙ্গনাথ যদি দরবারে থাকে লুকিয়ে তাকে  
আমার কাছে নিয়ে আসবি । পাঞ্জা নিয়ে যা ।

( পাঞ্জা দান । )

সরষু, তোমার ছোটো কথা শিখিয়ে দিই । ( কানে কানে কথা )

সরষু ও খোজার প্রস্থান ।

( স্বগত ) গুরুতর কর্তব্যের ভার স্বন্ধে নিইছি ! পরোপকার, হত-ভাগিনীর অশ্রু বিমোচন ! সরষুর এ কাজ আমার সম্পন্ন কত্তেই হবে । সে হিন্দু হলেও তার প্রতি আমার কোন বিদ্বেষ নাই । সে আমার আশ্রিতা, অমুগ্রহভিখারিণী, সে আমার বাদী নয়—সঙ্গিনী । আমি তার অশ্রু মুছাব ; তার মেঘমলিন মুখমণ্ডল প্রভাত-রবিকরস্নাত কুসুমতুলা প্রফুল্লিত করব । রজনাত্ম আসুছে, কৌশলে তার উদ্দেশ্য বুঝতে হবে—কৌশলে কার্য সম্পন্ন কত্তে হবে ।

[ রজনাত্মের প্রবেশ ]

আপনার নামই রজনাত্ম ?

রজনাত্ম । আজ্ঞা হাঁ শাজাদি, অধীনকে কি জন্তু অমুগ্রহ ক'রে স্মরণ করেছেন ?

জেহা । আপনাকে দেখ্ব বলে ; কিছু কাজও আছে । বাদশাহ কাছে আপনার কাজ শেষ হয়েছে ?

রজনাত্ম । না শাজাদি, আর কতদিন যে এমন করে থাকতে হবে, তাও জানি না ।

জেহা । এতকাল আপনি এখানে বাস ক'চ্ছেন, দেশের জন্তু আপনার মন কেমন করে না ?

রজনাত্ম । কোথায় আমার দেশ ? যে দেশে আমার গৃহ নাই, আশ্রয় নাই, স্থান নাই, সে দেশ আবার আমার দেশ কি ? সে এখন রাজারামের



দেশ। আমি কি আজ ভিখারী হয়ে সেই রাজারামের দরবারে মস্তক  
অবনত করবার জন্য দেশে প্রত্যাবৃত্ত হব ?

জেহা। কেন, আপনার স্ত্রী পুত্র নাই ?

রঙ্গ। না।

জেহা। আপনি বিবাহ করেন নি ?

রঙ্গ। করেছিলুম, কিন্তু বিবাহের পরই স্ত্রীকে পরিত্যাগ করেছি।  
তার পিতা আমার শত্রুপক্ষ অবলম্বন করেছিল।

জেহা। পিতার উপর রাগ করে স্ত্রীকে ত্যাগ করেন ? বিবাহিতা  
নারী কার সম্পত্তি ?

রঙ্গ। অত ভাবিনি ; যে শত্রুর ছায়া স্পর্শ কর্তে নেই, তার কস্তা  
স্পর্শ কর্তেও প্রবৃত্ত হরনি।

জেহা। এখন আপনার স্ত্রী কোথায় ?

রঙ্গ। জানিনা, খবর পেয়েছি সে এখন পথের কাঙ্গালিনী হয়েছে।

জেহা। তবে কি রাজা রঙ্গনাথের রানী অনাশ্রিতা হয়ে পথে পথে  
বেড়াবে ?

রঙ্গ। রাজা রঙ্গনাথ কোথায় যে তার রানী ? বাদশাহী দরবারে প্রতি  
হরকরার নিকট, মোগল-শিবিরের প্রত্যেক বরকন্দাজের সমক্ষে মাকে  
অনুগ্রহের জন্য নতজানু হতে হচ্ছে, সে আবার রাজা—সে আবার মানুষ ?  
বাদশাহ আলমগীরের সিংহাসন হিন্দুস্থানে অটল হউক, ভারতসমীপ  
মোগল-পতাকাকে চিরদিন আন্দোলিত করুক, কিন্তু মার্জনা করবেন  
শাজাদি, আমি যে মনুষ্যস্বহারা পরাধীন দাস, তা ভুল্ব কেমন করে ?  
আমি আর রঙ্গনাথ নাই, একটা লজ্জা, ঘৃণা ও অপমানের আধার মাত্র ;  
এ হৃদয়ে আর প্রেম স্মৃতি কিছুই নাই। রাজ্য রাজ্য ; রাজ্য আগে,  
ভার্য্যা পরে ; আগে প্রাধান্য, পরে প্রেম !

[ সরযুর প্রবেশ ]

জেহা । কি সরযু ?

সরযু । আপনি অসুস্থ ছিলেন, কেমন আছেন দেখতে এলুম্ ।

জেহা । আমি ভাল আছি, তুমি যাও ।

[ সরযুর প্রস্থান ।

রত্ন । বাঃ কি সুন্দর !

জেহা । কি হল, আপনার কি কোন অসুখ করেছে ?

রত্ন । বুঝতে পাচ্ছি না, অসুখ কি আরাম, বেদনা কি বিলাস, প্রমোদ কি প্রমাদ !

জেহা । এতো মন্দ রোগ নয়—আপনার কি এ পীড়া আছে না কি ?

রত্ন : আশ্চর্য না, হঠাৎ বুকের ভেতরটা কেমন করে উঠলো শাকাদি ? অনুগ্রহ করে অধীনকে একটা কথা জিজ্ঞাসা কতে অনুমতি দেবেন ?

জেহা । একশোটা ।

রত্ন । উনি কে ?

জেহা । কিনি ?

রত্ন । যিনি এইমাত্র এসে চ'লে গেলেন ?

জেহা । ওর নাম সরযু; আমার একজন পরিচারিকা । হ্যাঁ, যা বলছিলাম, আপনাকে যে এই বিপদসঙ্কুল স্থানে ডাকিয়ে এনেছি, তার কারণ হচ্ছে—

রত্ন । ( অন্তমনস্ক ভাবে ) বেরাদপি মাফ্ হয়—ওঁকে হিন্দুরমণী বলে বোধ হ'ল !

জেহা । শুধু তাই, না মুগ্ধ বোধও হ'ল !

( সরযুর পুনঃ প্রবেশ । )

রঙ্গ । কি সুন্দর !

সরযু । শাজাদি, উদিপুরী বেগম আপনাকে অভিবাদন জানিয়েছেন ।

জেহা । রাজা সাহেব, আমি চলুম ; সরযু আপনাকে পাঠিয়ে দেবে ।

আর একদিন আপনার সঙ্গে কথা হবে ।

সরযু । ( স্বগত ) স্বামীর হৃদয় ত একেবারে শুকিয়ে যাবনি । এ দৃষ্টির অর্থ কি—লালসা না প্রেম ? ( প্রকাশে ) আপনি এখনই যাবেন কি ?

রঙ্গ । একটু থেকে আপনাকে দু'একটা কথা জিজ্ঞাসা করতে পারি ?

সরযু । বলুন ।

রঙ্গ । হিন্দু-রমণী হ'য়ে আপনি মোগলের রংমঠলে কেন ?

সরযু । হিন্দু হ'য়ে আপনিই বা মোগলের দরবারে কেন ?

রঙ্গ । আমি অন্তায়রূপে আমার নিজের রাজ্য থেকে বঞ্চিত হয়েছি বলে, নিজের ক্রায়া অধিকার পুনঃ প্রাপ্তির জন্ত বাদশার সাহায্যপ্রার্থী ।

সরযু । আমিও অন্তায়রূপে নিজের রাজ্য থেকে বঞ্চিত হ'য়েছি বলে—

রঙ্গ । সেকি, আপনি রাজরানী !

সরযু । রমণী মাত্রেই রাজরানী, যদি পতিসোহাগিনী হয় ; আমি এখন ভিখারিণী !

রঙ্গ । আহা, এমন পারিজাত অনাদরে ধুলার ফেলে দেয় কোন্ পাষণ্ড !

সরযু । আপনি বোধ হয় পাষণ্ড নন—পারিজাতের আদর জানেন ?

রঙ্গ । এ পারিজাতের পরিবর্তে, পৃথিবীর সাম্রাজ্যও তুচ্ছ ।

সরযু । আপনি ত দেখছি ললিত আলাপে ললনাকে প্রলোভন

দেখাতে বিলক্ষণ পটু । তবে যেন শুন্তে পাচ্ছিলুম শাজাদীকে বলছিলেন, স্বপ্তের ওপর রাগ করে পত্নীকে ত্যাগ করেছেন ?

রঙ্গ । সেটা কি এত নিষ্ঠুর কাজ ?

সরযু । না, সেটা খুব দয়্যার কাজ ! থাক, ও কথায় আর কাজ নেই । একটা কথা আপনাকে জিজ্ঞাসা করি, আপনি ত স্বার্থসিদ্ধির জন্তু বিদেশীর চরণাশ্রিত ; স্বজাতির শবের ওপর সিংহাসন পেতে শ্মশানরাজ হবার স্পৃহায় লালায়িত । তাতে আজ পর্যন্ত কতদূর সফলকাম হয়েছেন ? আপনার প্রতি বিজয়লক্ষ্মীর একবারও কি কটাক্ষপাত হয়েছে ?

রঙ্গ । না হয়নি ; কিন্তু সে একটা নীচাশয় বিলাসী মুসলমান সেনানায়েকের আলমশে ও উপেক্ষায় । কাশিম একবার মন দিয়ে লড়লে—

সরযু । কাশিম লড়বে ? হিন্দু রাজাকে সিংহাসনে প্রতিষ্ঠিত করবার জন্তু মুসলমান লড়বে ? কেন, আপনার ক্ষত্রিয়বাহতে কি পক্ষাঘাত হয়েছে ?

রঙ্গ । আমি একা—

সরযু । না, শুধু একা নয় । আপনি নাই—আপনার জীবন নাই ; আপনি শব । পুরুষের শক্তি নারী—শক্তিহীন পুরুষ শব । কার জন্তু সংসার, কার জন্তু রাজ্য ঐশ্বর্য্য ? কার লজ্জা ধর্ম্ম মর্ঘ্যাদা রক্ষা করবার জন্তু আপনি প্রাণকে তুচ্ছ করে অনলের মুখে ছুটে যাবেন ? কার মুখ মনে করে, আপনার বুকে বল আসবে ? কার তেজোজ্জ্বল স্নেহদৃষ্টির সুধাবৃষ্টিতে অস্ত্রাঘাতের জ্বালা জুড়িয়ে যাবে ? অশোকবনে বন্দিনী জনকনন্দিনীর অশ্রুসিক্ত মুখখানি মনে না পড়লে কি রামচন্দ্র লক্ষ্মণের বুকে শক্তিশেল সহ্য করতে পারতেন, না দশাননকে সবংশে নিধন করতে পারতেন ? অর্জুনের গাণ্ডীব নয়, ভীমের গদা নয়, শ্রীকৃষ্ণের পৃষ্ঠ-পোষকতা নয়—কুরুক্ষেত্রে পাণ্ডবের প্রচণ্ড বিক্রমের প্রধান কারণ—

কৃষ্ণার কুটিল দৃষ্টি ; তাঁর পৃষ্ঠবিলম্বিত বিগলিত বেণী । কৰ্ণাটরাজ, শত্রু-  
শোণিতে হস্ত রঞ্জিত কর্বেন মনে করেছেন ? সে রক্ত মুছ্বেন কোন্  
পাঞ্চালীর কৃষ্ণ কেশরাশিতে ?

রত্ন । বৃদ্ধে পাঁচি আপনার মতন সহধর্মিণী পেলে অতি হীন  
ব্যক্তিও জগৎজয়ী হতে পারে ? আভাসে আপনার উচ্চবংশের পরিচয়  
কতক দিয়েছেন, এখন বলতে পারেন কতকাল সাধনা কলে আপনার  
মত সহধর্মিণী ভাগো ঘটে ?

সরযু । গুণধীনা মুখরা দাসীকে লজ্জা দেবেন না । আমার কথা  
ছেড়ে দিন, তবে সাধনার কথা বল্ছিলেন—তুনেছি, সকল সাধনার  
শ্রেষ্ঠ পথ প্রেম । প্রেমে ঈশ্বরকে পাওয়া যায় ।

রত্ন । প্রেম, সুন্দার, প্রেম ! মুহূর্ত্ত মাত্র আলাপের পর, তিলেক মাত্র  
ঐ তিলোত্তমা প্রতিমা আমার আকুল নয়নে প্রতিবিম্বিত হবার পর,  
কেমন করে বোঝাব—

সরযু । ধামুন—ধামুন ; আমি আমার প্রতি প্রেমের পরিচয় চাচ্ছি  
না । স্বজাতির প্রতি আপনার প্রেম কৈ ? যে ধর্ম-প্রাণ, মারাঠাবংশে  
আপনি জন্মগ্রহণ করেছেন—তার প্রতি আপনার অমুরাগ কৈ ? বে  
স্বজাতিকে ঘৃণা করে, স্বধর্মকে ঘৃণা করে—সে কি সহধর্মিণীকে ভাল-  
বাসতে পারে ? রাজন, প্রেমের সাধনা করুন ; বিদ্বেষ বিসর্জন দিন ;  
স্বজাতির প্রেমে আপনার হৃদয়ের অমৃতকুণ্ড পূর্ণ করুন ; দেখ্বেন সেই  
পবিত্র প্রেমের আকর্ষণে আপনার মানসী প্রতিমা আপনার সঙ্গে  
মিলিত হবে ।

রত্ন । সরযু ! তোমার কথার আমার হৃদয়ে বিপ্লব উপস্থিত হলো ।  
বাসন্তীও ঐ রকম কথা বলে । আমি ভাববো ?

সরযু । এখন আসুন, আর এখানে থাকা উচিত নয় ।

রঙ্গ । চল, ( গমনকালে স্বগত ) তুমি আমার সরস্বতী, তুমি আমার  
লক্ষ্মী, তুমি আমার শক্তি ! হৃদয়ে থাক—আমার রক্ষা হবে ; হৃদয়  
থেকে সরে যাও—অমনি পথ হারাব !

[ উভয়ের প্রস্থান ।

## তৃতীয় দৃশ্য

রঙ্গনাথের কক্ষের সম্মুখ ।

গীত ।

বাসন্তী ।

দিলে অনাথা বালা, নাও কি মালা বংশীধারী ?  
বিনা দীননাথ অন্য প্রাণনাথ চাহে না কুমারী !

যে হৃদয় জুড়ে হরি তব রূপ রাজে,  
মন বন মাঝে যঁার বাঁশী সদা বাজে,  
শ্রেয়সী সাজিয়ে সেথা কোন লাজে,

বসাব অপরে বিনোদ-বিহারী !

পাগলিনী গোয়ালিনী গোকুলে গহনে,  
পেয়েছিল পতিরূপে রতিপতি মোহনে,  
আমিও ত অতি দীনা, তোমা বিনা আর জানি না,  
(তাই) রাজাচরণ, কালবরণ ! চাহি হে তোমারি !

[ সরযুর প্রবেশ ]

বাসন্তী । ( সচকিতে ) কেও, কেগা কে তুমি ? ( সরযুর বস্ত্রাবরণ  
মোচন করণ ) বা—বা—কি সুন্দর ! কি সুন্দর ! তুমি রাধিকা—  
ব্রজেশ্বরী রাধিকা ! না ?

সরযু । আমার পরিচয় পাবে । এই তো রাজা রজনাতের বাড়ী ?  
তিনি কোথায় ?

বাস । তিনি তো এখন বাড়ী নেই । তুমি বড় সুন্দর—বড়  
সুন্দর !

সর । রাজা এখনও বাড়ী এসে পৌছান নি ! আঃ—বাচ্চলুম্ !  
বেশ হয়েছে ।

বাস । তুমি কি তাঁকে চেন ? তুমি কি তাঁর কেউ হও ?

সর । তোমার সঙ্গে আমার অনেক কথা আছে । তুমি ত সেই  
মেয়েটী, রাজা যাকে প্রতিপালন করেছেন ?

বাস । হাঁ—আমি বাসন্তী—বাবা আমার পথথেকে কুড়িয়ে এনে-  
ছিলেন ! না—না, বাবা কুড়িয়ে আনেন নি, আমার দীননাথ আমার  
কুড়িয়ে নিয়ে বাবার চাতে তুলে দিচ্ছেন ! আমার কেউ ছিল না ।  
কেমন আদরের বাবা পেলুম্, কিন্তু একটী মা পেলুম্ না ; এর জন্তু বাবাকে  
আমি কত বলি । আহা—তুমি কেমন সুন্দর ; তুমি যদি আমার কেউ  
হতে—মা কি দিদি !

সর । আমি তোমার চেয়ে সুন্দর নই, তোমার বৃকে করে রাখতে  
ইচ্ছা করে । কিন্তু এখন নয় । রাজার সঙ্গে আমার দেখা হয়েছিল,  
তিনি এলেন বলে । আমি অল্প পথ দিয়ে এসেছি—তাই আগে পৌছাতে  
পেরেছি ।

বাস । বাবা তোমায় দেখেছেন—তিনি তোমায় চেনেন ?

সর । তুমি যদি খানিকক্ষণের জন্তু তোমার ঘরে আমার লুকিয়ে রাখতে পার, তা' হ'লে তোমায় সব বলবো ।

বাস । তুমি এখানে থাকবে ? থাকনা—থাকনা—আমি তোমায় খুব ভালবাসবো ।

সর । থাকবো ; আমিও তোমায় খুব ভালবাসবো । কিন্তু এখন নয় ! উপস্থিত তোমার ঘরে আমার লুকিয়ে রাখবে চল । রাজা সাহেব যেন কিছু না জাস্তে পারে, তাঁকে এখন কিছু বোল না ।

বাস । কেন, এই যে বললে, বাবাকে তুমি চেন ?

সর । বেশী কথা বলবার সময় নেই,—শিগ্গির তোমার ঘরে আমার রেখে এসো । এখন গোল কোরোনা ; তারপর বুঝতে পারবে যে, রাজার ভালর জন্তে, তোমার ভালর জন্তে আমি এখানে এসেছি । চুপ্ করে রইলে কেন ? তুমি আমার বিশ্বাস কচ্চ না ?

বাস । না না, তা না ; তোমায় দেখেই ভালবাসতে ইচ্ছা হয়েছে, আর তোমায় বিশ্বাস করবো না ! তুমি আমার দীননাথকে বিশ্বাস কর ত, তাঁকে ভাল বাস ত ?

সর । আমি দীননাথের দাসী, তিনি আমার সর্বস্ব ।

বাস । অ্যা—অ্যা, তবেত আমি ঠিক ধরেছিলুম । তুমি ব্রজেশ্বরী রাধিকা ! এসো—

[ উভয়ের প্রস্থান ।

[ রত্ননাথের প্রবেশ ]

রত্ন । রাত্রি অনেক হয়েছে, বাসন্তী বোধ হয় শুয়েছে । বাসন্তী আমার মাতৃস্নেহের কাঙালিনী ! যদি সরযুর কোলে তাকে তুলে দিতে পারি, তাহলে বালিকার কোন অভাবই থাকবে না । ইস, আমি যে



স্বপ্নে নন্দন কানন তৈরী করে ফেলেছি ! বাসন্তীলাভের ইচ্ছা যদি কাশিমের ক্ষণিক মোহ না হয়, তা হলেই বিষম বিপদ । সে যে নীচ প্রকৃতি, বাসন্তীকে না পেলে কখনই আমার রাজ্যোদ্ধারের সহায়তা করবে না । একটা কপা, লম্পটের চক্ষে না দেখে পত্নীভাবে গ্রহণ কতে চায় । মন্দের ভাল—এই যা । কিন্তু বাসন্তী আমার বনহরিণী, বিজাতীয় ব্যাঘ্রের ঘরে গেলে সে তরাসেই স্তব্ধ হয়ে যাবে । ( নেপথ্যাভিমুখী হইয়া ) বাসন্তি, ঘুমিয়েছে কি ? বাসন্তি—

বাস । ( নেপথ্যে ) কে বাবা ? যাচ্ছি,—

রত্ন । না-না, শুয়ে থাক, উঠনা, বিশেষ তেমন আবশ্যক নাই ।

[ বাসন্তীর পুনঃ প্রবেশ ]

বাস । না বাবা, ঘুমুব কেন ? তুমি এখন আসনি—আর ঘুমুব ? আমি বাইরে এতক্ষণ বসে ছিলাম ।

রত্ন । বাইরে বসেছিলে কেন ?

বাস । এই তোমার জন্তে, আর যদি কেউ আসে টাসে ।

রত্ন । দেখ মা, তুমি আর আগেকার মত বেশী বাইরে টাইরে থেকে না ; ক্রমে বড় হচ্ছে ; ভিখরী ফকির আসে, দাসী টাসীর হাতে ভিক্ষে পাঠিয়ে দিও ।

বাস । কেন, কি হয়েছে ?

রত্ন । এ বড় খারাপ সহর । এখানে, মা, কত রকমের লোক আসে । কে কি ভাবে আসে তাকি বলা যায় । শুনলুম এর মধ্যে কবে কি একটা ফকিরকে ভিক্ষা দিয়েছিলে, সে ব্যাটা বড় বড় ব্যাগায় গিয়ে—

বাস । কি, আমার গাল দিয়েছে ?

রত্ন । না না, গাল নয়, বরং সুখ্যাতি করেছে । কিন্তু এ বাদশাই সহরে স্ত্রীলোকের রূপের সুখ্যাতি তার বিপদের কারণ হ'তে পারে ।

বাস । ( সহাস্তে ) কেন, আপনার বাদশাই মূলুকে সুন্দরী স্ত্রীলোকের ফাঁসী হয় নাকি ?

রঙ্গ । সুন্দরীর নয়, তবে অনেক সময় তার সৌন্দর্যের ফাঁসী হয় বটে ।

বাস । ছি-ছি, আপনার বাদশা এত ইতর !

রঙ্গ । আমি বাদশাকে মনে করে একথা বল্চিনে, তবে তাঁর কৰ্ম-চারীদের অনেকে—

বাস । বুঝছি, বুঝছি, অনেক সময় চাকরের আচার দেখলেই মনিবের প্রকৃতি বোঝা যায় ।

রঙ্গ । থাক্, ও সব কথা থাক্, তুমি শোওগে । সাবধান কচ্ছিলেম্ কি জন্তে জান, তোমার কণ্ঠাকণ উদ্ধারপ্রায় ; শীঘ্রই তোমার বিবাহ দিতে হবে । তোমার যে অপরূপ রূপ, তোমার যে সুন্দর স্বভাব, তাতে আমার আশা আছে যে, তোমার সামান্য ঘরের ঘরনী হ'তে হবে না ।

বাস । সে কি বাবা, আপনি কি আমার দূর করে দিতে চান ?

রঙ্গ । ছি, ও কথা কি বলতে আছে ? কিন্তু, মা, জানত, কণ্ঠার উপর পিতার অধিকার অতি অল্পকালস্থায়ী । পরের ঘরে যাবার জন্তই তার জন্ম । বালিকা পিতার—স্বতী পতির ।

বাস । তা বাবা, এমন বরের সঙ্গে আমার বিয়ে দাওনা, যাতে তোমার ছেড়ে না যেতে হয় ?

রঙ্গ । গৃহপালিত জামাতা ! ছি ছি !

বাস । গৃহপালিত কি বাবা, বরং বল, সেই জামাইয়ের বাড়ীতেই পৃথিবী শুদ্ধ লোক বাস কচ্ছে, তার খাচ্ছে !

রঙ্গ । এই, বেটী, পাগলামী আরম্ভ করে !

বাস। বাবা, পৃথিবীতে মিথ্যার মর্যাদা কি এত বেশী, যে কেউ সত্যের কথা পাড়লেই লোকে তাকে পাগল বলে ?

রঙ্গ। ভগবানকে বিয়ে করবি—এ পাগলামীর কথা নয় ত কি ?

বাস। কেন, ভগবান্ পিতা হ'তে পারেন, মাতা হ'তে পারেন, আর পতি হ'তে পারেন না ? এই ত তুমিই বললে—বালিকা পিতার, যুবতী পতির। পতি যদি যুবতীর এতই আপনার জন, তা' হ'লে ভগবান্ থাকতে সে আপনার জন অন্তকে কত্তে যাব কেন ?

রঙ্গ। আচ্ছা, তুমি শোওগে, আমার এখন অনেক কাজ আছে। কাশিম যুদ্ধে যেতে ইতস্ততঃ কচ্চে—যদি এই সময় রাজারামকে আক্রমণ কত্তে না পারা যায় তা' হ'লে আমার সকল আশাই নিশ্চল হবে।

বাস। বাবা, কেন আর—

রঙ্গ। এখন এসো মা—

[ বাসস্তীর প্রস্থান।

রঙ্গ। ( স্বগত ) সেনাপতির অপরাধ কি ! এ রক্তহার সম্রাটকেও প্রলোভিত কত্তে পারে। আগে ভাবতেম্ বটে যে একটা তুচ্ছ স্ত্রী-লোকের জন্ত লোকে এত লালায়িত হয় কেন ? কিন্তু আজ সরযু আমার হৃদয়ে ঘোর বিপ্লব উপস্থিত করে দিয়েছে। মরুতে সরিৎ সৃষ্টি কত্তে—মহানিশায় দীপ দান কত্তে—আমার রাকসী আশার কোমল প্রাণ প্রতিষ্ঠা কত্তে—কোথা হ'তে ললিতলীলা-ভঙ্গ-ভঙ্গিম সরযু এসে দেখা দিলে ! সরযু-লহর-লাঙ্ঘিত কৃষ্ণকেশতরঙ্গে সরযুর শ্রামাঙ্গ-শোভা উদ্ভাসিত, সরযুর নয়নে ব্রজের বিগলিত প্রেম-প্রবাহিনীর তারল্য, সরযুর কণ্ঠে কালিন্দীর আনন্দ-কল্লোল ! মরি-মরি ! ভংসনার কি সহানুভূতির সাস্বনা ! তিরস্বারে কি প্রীতির পুরস্কার ! অমুযোগে কি অমুনয় ! সিংহাসন এখন পূর্বাপেক্ষা অধিক প্রয়োজনীয় হয়েছে।

কণ্টকতরু ছেদনই এখন জীবনের একমাত্র উদ্দেশ্য নয়, সঙ্গে সঙ্গে কুম্ভ-  
তরু রোপণের সুকুমার সঙ্কল্পকেও হৃদয়ে স্থান দিয়েছি। যে সিংহাসন  
সরযুর রূপে আলোকিত হবে, তার মূল্য আমার চক্ষে এখন অপরিমেষ !

[ জনৈক সেনানীর প্রবেশ ]

সেনানী। আদাব, রাজা সাহেব।

রঙ্গ। আদাব, কি সংবাদ ?

সেনা। বড় খোস্খবর। ছত্রপতি রাঘগড় দুর্গে অবরুদ্ধ ; আপনার  
রাজ্য এখন একরূপ অরক্ষিত। এই সুযোগে যদি আপনি বাদশাই  
ফরমান নিয়ে রাজ্যে প্রবেশ করতে পারেন, তা' হ'লে বোধ হয় অতি সহজে  
আপনার কার্য সিদ্ধি হয়।

রঙ্গ। বল কি ! আমি এখনই ফরমানের জ্ঞা দরবারে যাচ্ছি ;  
সেনাপতি প্রস্তুত আছেন তো ?

সেনা। সেনাপতি পীড়িত !

রঙ্গ। পীড়িত ! তবে তোমায় কে পাঠালে ?

সেনা। আজ্ঞে সেনাপতি কাশিম বাহাছরই পাঠিয়েছেন ; তিনি  
শয্যাগত !

রঙ্গ। ভাল, আমি নিজেই নেতৃত্ব গ্রহণ করবো, তুমি শীঘ্র সৈন্ত  
পল্টন প্রস্তুত করগে।

সেনা। কাশিমখাঁর সৈন্তগণ অস্ত্রের অধীনে বৃদ্ধ করতে সম্মত নয়।

রঙ্গ। সে কি ! তবে কি জ্ঞা কাশিম তোমাকে আমার নিকট  
পাঠিয়েছেন ? আমি একা গিয়েই যদি কার্যোদ্ধার করতে পার্ন্তে, তবে  
এতকাল এখানে তাঁবেদারী কচ্ছি কেন ?

সেনা। সেনাপতি বলে পাঠিয়েছেন যে এমন সুযোগ আর হবে না !

রঙ্গ । তাতো নিশ্চয়—

সেনা । কিন্তু সেনাপতি পীড়িত !

রঙ্গ । এর মধ্যে কি হ'ল ?

সেনা । ভারি ব্যায়রাম । খাঁ বাহাদুর বলেন, তার ওষুধ আপনার কাছেই আছে ।

রঙ্গ । হুঁ—

সেনা । আজ যদি সেনাপতি আরাম হন, তা' হ'লে পরে সন্ধ্যার পূর্বে আপনি আপনার পৈত্রিক সিংহাসনে নিব্বিয়ে বসতে পারবেন ।

রঙ্গ । ( স্বগত ) তাইত ! হেলায় হারাব—হেলায় হারাব ! একটা বালিকার পাগলামাতে ভুলে পিতৃরাজ্য উদ্ধারে বিরত হব ?

সেনা । আজ শেষ রাত্রে কুচ করলে কাল দ্বিপ্রহরের পূর্বেই—

রঙ্গ । হাঁ—আমি বৃদ্ধেত পেরেছি, আর বোকাতে হবে না ।

সেনা । সেনাপতির যেরূপ অবস্থা দেখে এসেছি, তাতে বোধ হয় তাঁর ব্যায়রাম আরো বাড়ছে ।

রঙ্গ । আপনি অপেক্ষা করুন, আমি ঔষধ করে আনছি । [ প্রস্থান ।

বাসন্তী । ( নেপথ্যে ) আমার আবার ভাল কি ! তোমার সুখের জন্য আমি প্রাণ পর্য্যন্ত দিতে পারি ।

রঙ্গ । ( নেপথ্যে ) তোমার ভাল আমার ভাল, তোমার সুখেই আমার সুখ ।

সেনা । ( স্বগত ) ঐগো তোমার ভাল—আমার সুখ ! জমাধরচ যাই হোক, কৈফিয়ৎ কেটে দাঁড়ালো, আমার ভাল, আমার সুখ ! হয়েছে, সেনাপতি সাহেবের পক্ষাঘাত আরোগ্য হবার ওষুধ তৈরী হয়েছে । এখন গন্ধমাদন বা আমাকেই কাঁধে করে নিয়ে যেতে হয় !

রঙ্গ । ( নেপথ্যে ) নিশ্চিত থাক মা—নিশ্চিত থাক ।

সেনা । একেবারে নিশ্চিন্তপুরে গিয়ে নিশ্চিন্ত থাকবে এখন !

[ রঙ্গনাথের প্রবেশ । ]

রঙ্গ । হাবিলদার সাহেব, সেনাপতিকে শিবিকা পাঠাতে বলুন, আমার মঙ্গলাকাঙ্ক্ষিনী বাসন্তী যেতে প্রস্তুত ।

সেনা । এমন শুভ সময় আপনার সেখানে উপস্থিত থাকা উচিত ।

রঙ্গ । না না, আমাদের হিন্দু-কন্ঠারা পিতৃগৃহ ত্যাগের সময় বড় কান্নাকাটি করে, সে দৃশ্য আমি দেখতে পারবো না । আমি দরবারে চলুম, বাদশার নিকট ফারমান আনতে হবে ; আজ শেষ রাত্রেই কুচ করবো ।

সেনা । যে আজ্ঞে ।

রঙ্গ । শোন শোন হাবিলদার সাহেব—একটা কথা জিজ্ঞাসা করি ; কাশিম খাঁর বিবিরা বেশ সুখে থাকে তো ? উনি তাদের কোনরূপ কষ্ট দেন না তো ?

সেনা । শোভন আল্লা ! কাশিম বাহাদুর, ছদ্মনের সামনে দানা, কিন্তু জেনানার—

রঙ্গ । তা' হলেই হ'ল, তা' হলেই হ'ল ! বাসন্তী আমার বড় যত্নের ধন ।

সেনা । তা আর কথা আছে ! [ প্রস্থান । ]

রঙ্গ । কি করলুম ! কেন বাসন্তীকে সেনাপতির হাতে দিতে স্বীকার হলুম ! কি করি—উপায় নাই । সে যে আমার রাজ্যসুখের অন্তরায় । তাকে দিয়ে যদি রাজ্য পাই, তবে ত সবই পেলুম । রাজ্যের তুলনার রমণী—অতি তুচ্ছ, অতি তুচ্ছ ! আশুক রাজ্য, যাক্ রমণী, যাক্ স্নেহ, যাক্ মায়া, যাক্ মমতা ! ও সব মরে গেলেই ফুরিয়ে যায়, রাজ্য চিরকাল থাকে ! আশুক রাজ্য, যাক্ রমণী ! [ প্রস্থান । ]

## চতুর্থ দৃশ্য ।

রঙ্গনাথের বাটার পার্শ্বস্থ পথ ।

[ চৌকিদারের প্রবেশ ]

চৌকি । হৈঃ—ই-ই-ই, দেড় পহর বাজা হো—চেং রহো—জাগ  
রহো—বেয়ং হুসিয়ায়—

[ মুন্সিলাসানবেণী গোবর্দ্ধনের প্রবেশ ]

গোব । ইয়া পীর—

চৌকি । আরে তোম্ কোন্ হায় ?

গোব । ফকির হায় বাবা, ইয়া পীর মওলা—

চৌকি । এত্না রাত্‌মে চেয়াক জাল্‌কে চিল্লাতা—তোম্ চোটা হায় ?

গোব । বাহবা-বাহবা—কেয়া নাড়ীজ্ঞান হায় ! তোম্ দেড় কোশ  
পথসে গলাবাজী কর্তা, আর হাম্ এতবড় মশাল জাল্‌কে তোমার সামনে  
দিয়ে চুরি কর্‌নে যাতা !

চৌকি । তোম্ কেয়া চুরি কিয়া—কাহা চুরি কিয়া ?

গোব । এ কেয়া অসঙ্গত কথা বল্‌তা চৌকিদার সাহেব ? তোমাকে  
কাঁকি দিয়ে চুরি কল্‌লে ধর্ম্‌সে সহেগা কেন ? ধর্ম্‌ কি নেহি হায় ? আজও  
তো সোমবারের পর মঙ্গলবার হোতা, নারেকেল গাছমে কাঁটা ফল্‌তা ?

চৌকি । তোম্ চোর নেহি হায়—সাক্‌ বোল্‌তা ?

গোব । অমন একটা বিণ্ডে জান্‌তা তু তুঃখ কর্‌কে মুন্সিলাসানী  
করেগা কাহে ? তোম্ আমাকে দয়া কর্‌কে সাক্‌য়েদ করেগা ?

চৌকি । কেয়া সাক্ষরেন ?

গোব । এই চুরি বিজ্ঞেকা ।

চৌকি । কেয়া, হাম্ চুরি কর্তা ?

গোব । আমি তা কি বলতা ? এখন ত ঘরে বস্কে বক্রা মার্তা। আগে আগে ত কিয়া । যেমন শোয়াপোকা পাক্তে পাক্তে প্রজাপতি হোতা, তেমনি চোরও পাক্তে পাক্তে চৌকিদার হোতা ; কেমন, এই না ?

চৌকি । তোম্‌রা বুলি কুচ্ সমজাতা নেই । তোম্‌ কোন্ মুলুক্‌কা আদমী ?

গোব । যে মুলুক্‌ মে উল্লুক নেই—এই তোমার মতন ।

চৌকি । তেরা চেরাক কা ভিতর কেয়া ছায় ?

গোব । তেল ছায়, আর কেয়া ছায় । লেও, থোড়া নাকমে দেকে নিশ্চিন্তি হোকে নিদ্রা যাও । ( তৈল লঠিয়া চৌকিদারের নাসিকায় প্রদান )

চৌকি । কেয়া, তোম্‌ হামেরা মোচ্ পাক্‌ড়াওগে ? দেখ্‌তা ডাঙা ?

গোব । ডাঙা কোথা সাহেব, ও ত একটা আকাশ পিদ্দিম ছায় ?

চৌকি । আচ্ছা, শালা, খাড়া রহো, তোম্‌কো হাম্‌ দেখ্‌লায় দেগা ; চুপ্‌ চাপ্‌ খাড়া রহো !

( চৌকিদার বংশধর উত্তোলন করিয়া বধন মারিতে যাইবে তখন গোবর্দ্ধন বাশ ধরিয়া ঠেলা দিবা মাত্র চৌকিদার পড়িয়া গেল, গোবর্দ্ধনও বুঁকিয়া পড়ায় তাহার প্রদীপ হইতে পরসী পড়িয়া গেল । )

চৌকি । আরে গির্ গিয়া—গির্ গিয়া, তোম্‌ শালা ভাগা কাহে ?

গোব । বড় অন্তায় কিয়া ? মশাই উত্তোপ কর্কে হাম্‌কো মাথা ভালে গা—হাম্‌ বৃষকাঠ হোকে দাঁড়িয়ে থাকা নেই, বড় অন্তায় কিয়া ?

চৌকি । তোম্‌ ডরসে বড় বড় কিয়া, তবু হাম্‌ গির্ গিয়া ?



গোব । ডর কোথা দেখলে মিয়া, উল্টে তো তোমকে ধস্তে গিয়ে  
পয়সা সব ফেক্ দিয়া ।

চৌকি । ( ব্যস্তভাবে ) কাঁহা পয়সা—কাঁহা পয়সা ?

গোব । বা—বা, এখন ত দিবি বাংলা বুঝতে পারতা ?

চৌকি । বাস্তি দেখাও ভাই ?

গোব । নে, শালা নে, মনে করেছিলুম একটা কানাটানাকে দেবো ।

চৌকি । ( পয়সা কুড়াইয়া লইয়া ) গ্রেম্ আচ্ছা আদমী হায় ।

গোব । তা এতক্ষণে বুঝলে, হাম্ বড় বাদিত ছয়া !

চৌকি । দেখো, হাম্ খোড়া দূর ঐ মোড়মে রহেগা, তোম্ ঐ  
রাজাকে মোকামসে ঘো কুচ সকেগা লে লেও । লেকেন যানেকা বখৎ  
হাম্কে আধা বখরা দে দেও ভাইয়া ! হৈঃ—ই ই ই— [ প্রস্থান ।

গোব । আহা, সংসঙ্গে কাশীবাস !

[ বস্ত্রাবৃত সরযুর প্রবেশ ]

সরযু । ফকির সাহেব—

গোব । ইয়া পী—

সর । চুপ্ চুপ্ ( মুদ্রা দিয়া ) এট নাৎ, তোমাকে আর এ রাতে  
ভিক্ষে কস্তে হবে না । তোমার ঐ আলোটা দেখিয়ে, আমার সঙ্গে একটু  
এসোনা ?

গোব । এ আবার কে বাবা ? বলি, তোমার আবার মতলবখানা কি ?

সর । কিছু না, ঐ আলোটা দেখিয়ে আমার রংমহলের কাছ পর্যন্ত  
দিয়ে এসো, আমি তোমার আরো বকসিস্ দেবো ।

গোব । ও, রংমহলে যাচ্ছেন ? শ্রীমতীর অভিসার নাকি ? তা  
আমি বিন্দে নলিতেও নই, ছিদাম সুবলও নই । আপনি অন্য চেষ্টা  
করুন ঠাকরণ ?

সর। একটা স্ত্রীলোককে একটু পথ দেখিয়ে দিতে তোমার সাহস হয় না ?

গোব। আঙ্কে না, ওসব অভিসারের কাজে আমি কেউ নই। বরং চল, আঙ্কে আঙ্কে তোমার বাড়ী পৌঁছে দিয়ে আসি।

সর। কথাবার্তা শুনে তোমার ভাল লোক বলেই বোধ হচ্ছে। বিশ্বাস কর, আমার কোন মন্দ অভিপ্রায় নাই।

গোব। খোদার কসম ?

সর। আমি হিন্দু-কণ্ঠা।

গোব। হিন্দুর মেয়ে ! তাই তুমি রংমহলে যেতে চাচ্চ ? তার চেয়ে চলো, এই আলো ধরছি, ভীমানদী এখান থেকে বেশী দূর নয়। "নাও মা" বলে একটা ঝাঁপ ; বলত আমি পেছন থেকে একটা ঠেলা দিতেও রাজি আছি। তলায় তোফা নরম বিছানা—আর কি ঠাণ্ডা ! দিবিা ঘুমিয়ে পড়বে ; চল—

সর। তুমি কে ? হিন্দু-কণ্ঠা শুনে আমার রংমহলে প্রবেশের পরিবর্তে ভীমার জলে জীবন বিসর্জন করতে বল্চ, তুমি কে ?

গোব। আমি মুন্সিলাসান ; সকল মুন্সিলের আসান হয় মলে, তাই তোমায় সোজা পথ দেখিয়ে দিচ্ছি।

সর। রসত—রসত—তুমি আবার কথা কও ?

গোব। একি—চোরে চোরে কুটুস্থিতে নাকি ?

সর। চুপ্ করে রইলে কেন, আলোটা তোল ? নিশ্চয় সেই, তোমার নাম কি গোবর্দ্ধন ?

গোব। তুমি হয় শাঁকচিল্লি, নয় দিদি ! এখানে আর কোন মেয়ে-মাল্লুষ ত আমাকে চেনেনা।

সর। আমি তোমার সেই দিদি—এই দেখ ! ( গাত্রাবরণ উন্মোচন )

গোব । একি দিদি !

সর । মনে পড়্‌চেনা ?

গোব । না, তোমার মনে পড়্‌চেনা—আমার দিদি কোথায় ?

সর । তোমার আর কোন্ দিদি আবার ?

গোব । আমার দিদি—সাগরছেঁচা বৈকুণ্ঠেশ্বরী, আমার দিদি টান্দে ধোয়া সরস্বতী । আমার দিদি বাদশার বাদী নয়, আমার দিদিকে দেখেছিলাম শিশিরে ভেজা শিউলি ফুল—তোমায় দেখছি বাগানের বেহায়া বেলা !

সর । আর আমি যদি বলি, আমার সেই ভাই আজ পেটের আলায় ফকির !

গোব । না, তা নয় ; আমার হাতে মুন্সিলাসানের চেয়াক, কিন্তু বুকের ভেতর তোমার মুখের আলো ! সেনাপতির আদেশেই আজ আমার এই দশা !

সর । তাইত বলছি, বাইরের বেশকে এখনও চিন্‌লেনা ? আমি যে রংমহলে যাচ্ছি, সেও এক মহা কাজে । তুমি তোমার সেনাপতির আদেশ পালন কচ্চ, আর আমি আজ আমার প্রাণপতির উদ্ধারে যত্নবতী ।

গোব । প্রাণপতি ! ও দিদি, তোমার স্বামী আছে ? তা বল নি ? দাদা কোথায় ?

সর । ঐ বাড়ীতে ।

গোব । ও যে রাজা রজনাতের বাড়ী ?

সর । তিনিই আমার স্বামী ।

গোব । ও দিদি, বলিস্ কি ? আমার মত অথকে অথকে ঘাটের মড়াকে তুই মানুষ করে নিলি, আর যে তোর আপনার চেয়েও আপনার তাকে শিকল কাটতে দিলি কেন ? ও দিদি, তুই সব পারিস্, সব পারিস্ ! মস্তুর পড়—মস্তুর পড়—বীজ মস্তুর পড় ! তোর শিব শব হয়ে

শ্মশানে পড়েছে! জাগিয়ে তোল, জাগিয়ে তোল, কৈলাসনাথকে  
কৈলাসে নিয়ে আস!

সর। তাই নিয়ে আসতেই এখানে এসেছি, চল তোমায় সব কথা  
বলবো, তাঁর সঙ্গে আমার বেথা হয়েছে, তিনি আমায় চেনেন না।

গোব। ( সুর করিয়া ) “তারা, কে পারে তোমায় চিন্তে”—

সর। চুপ্ কর, আমি এখন তাঁর বাড়ী থেকেই আসছি। রাজ্য-  
লোভে তিনি এক ভয়ানক ছুফাৰ্ঘ্য কর্তে যাচ্ছেন।

গোব। জানি, দিদি, জানি ; সেই কাশিমের কাণ্ড ত ?

সর। হাঁ, রাজ্যলোভে স্বামী আমার বাসন্তীকে সেই লম্পটের হাতে  
দিতে স্বীকৃত হয়েছেন। তাকে উদ্ধার করতে হবে।

গোব। বেশত, তার জন্মে আর ভাবনা কি ?

সর। বড় কঠিন কাজ—পারবে ? ভরসা হয় ?

গোব। ভরসা—তোমার ঐ মামামাথান মুখখানি, ভরসা—তুই অক্ষরের  
বীজ মন্ত্র “দিদি”। এসো, দিদি, চলে এসো। [ প্রস্থান

## পঞ্চম দৃশ্য ।

ভীমা-তীরে কাশিমের বিলাস ভবন ।

মদ্যপানে নিযুক্ত নর্তকী-পরিবেষ্টিত কাশিম ; পার্শ্বে গোবর্দ্ধন ।

নর্তকীগণ ।

গীত ।

আমরা মদন-মঞ্জরী !

ফুলের বনে, হাওয়ার সনে, মন্দ মধুর গুঞ্জরী ॥

আজকে নিশায়, বিভোর নেশায়, কে আসে কে যায়,  
যায় না বোঝা, উল্টো সোজা, কেবা কিবা গায়,  
মিষ্টি হাসি, রাশি রাশি—আ মরি মরি !

কাশিম। বাসন্তী বিবি আমার বেগম হবে ? কেয়া তোফা—কেয়া  
তোফা—দিল্ সরিফ করে দাও আসান সাথেব !

গোব। ( স্বগত ) কি করে সরিফ করবো তারই জরিপ কচ্ছি।  
আধ ভরিতেই কুপোকাং, এক ভরিতেই বাজীমাং । হো হো কালা চাঁদ,  
বেঁচে থাক, পাকা ছেড়ে কাঁচা ধরে আজ কি সুবিধেটাই হলো !  
( সুর করিয়া ) “আমি তাই কাল রূপ ভালবাসি !”

কাশি। ভাবছো কি আসান সাথেব ? সিরাজী দাও, দিল্ সরিফ  
হোক—হনিয়া হাস্তে থাকুক !

গোব। এই যে জাঁচাপনা—( মস্তদান )

কাশি। ( মস্তদান করিয়া ) বাহোবা—বাহোবা, কেয়া মিঠা বংদার  
সিরাজী, এসো বাইজী—নাচো, গাও, কুষ্টি কর !

নর্তকীগণ।

গীত।

( আজি ) এ মধু চাঁদিনী রাতে, হাস্য নৃত্য গীতে  
লুপ্ত হইয়া যাক অবনী ।

( আজি ) অঙ্গে জ্যোছনা মাখি, অধরে অধর রাখি  
নীরবে বহিয়া যাও তরণী ॥

( আজি ) মিলন আঁখিজলে বিষাদ মুছায়ে দাও,  
প্রণয় চুম্বনে বিরহ ভুলিয়া যাও,

( আজি ) এস হে এস হাসি, চরণে লুটাবে দাসী,  
আজি বঁধু মধু রজনী ॥

[ বাসন্তীর প্রবেশ । ]

কাশি । এসো বিবিজান ?

বাসন্তী । আমি দাসী, আমার ওরূপ সম্ভাষণ কচেন কেন ?

কাশি । তুমি কুত্বা কাফের রজনীথের কাছে সামান্য দাসী ছিলে—

বাস । আপনাকে মিনতি করে বনছি, আমার সামনে তাঁর নিন্দা করবেন না । তাঁর নিন্দা কানে শুনেও ঈশ্বর আমার উপর রাগ করবেন ।

কাশি । সে যদি তোমায় রাণী কল্প তা'হ'লে তার নিন্দা কল্পুম্ না । যাক্, ও কথা ছেড়ে দাও ; এইবার তুমি আমার বেগম হয়ে থাকবে । বিবিজান, আমার কাছে তোমার সুখ দেখে সবাই হিংসা করবে ।

বাস । কিসের সুখ—আমার ও সুখে কাজ নাই ?

কাশি । ওক বিবিজান, বেগুরো কথা বলোনা ; ছিলে চাকরানী, হবে রাজরানী ! ফুঁটি কর, বিবিজান, ফুঁটি কর !

বাস । কে বলে আমার চাকরানী—আমি রাজরানী । আমার দীননাথ আমার সর্বস্ব ; তিনি আমার সকল সুখে সুখী করেছেন, আমার কোন দুঃখ নাই !

কাশি । ও সব বুড়ুটে বুলি ছেড়ে দাও বিবি, এসো ( মত্তপূর্ণ পাত্র দেখাইয়া ) আমার এই রংদার সরবৎ একটু টেনে নাও ; ছনিয়ার সুখ তখন বুঝবে বাইজী ? বিবিজান, আমার ছনিয়া হোলো সুখের হাট ; এখানে যখন এসেছ, তখন আচ্ছা করে মজা লোট, আর ফুঁটি কর ।

বাস । ( কাঁদিতে কাঁদিতে ) দীননাথ !

কাশি । কাঁদচো কেন বিবিজান ? এত করে বোঝানুম্ তবু হুঃখ কিসের ?

বাস । হুঃখে নয়, অপমানে কাঁদছি ! যে সেই দীননাথকে আত্ম-সমর্পণ করেছে, লোকে কোন্ সাহসে তাকে প্রলোভন দেখায় ?

কাশি । না বিবি, আমার কাছে প্রলোভন নেই—আমার কাছে সব সাচ্চা । সত্যই তোমাকে আমার করবো ; বল—তুমি আমার ?

বাস । আপনাকে নিয়ে আমি কি করবো ?

কাশি । এখনও ঐ কথা—সেনাপতি কেউ নয় বটে ?

বাস । সত্যই ত প্রভু, সেনাপতি আমার কেউ নয় ।

কাশি । বাসন্তি, দণ্ডের ভয় কর কি ?

বাস । মানুষের কাছে নয় ।

কাশি । যদি কারাগারে দি ?

বাস । তাতেই বা কষ্ট কি ? সেখানে বসে তাঁর নাম ক'রবো, কারাগার আমার দেবালয় হবে !

কাশি । ( গোবর্দ্ধনের প্রতি ) বিবিজান ভাঙ্গা ভাঙ্গা সুরে কি বলচে মিয়াসাহেব শোন ? আমার তর্কিতের জোর নেই—বুঝলে আসান মিয়া, বিবিকে বোঝাও ! আমার ঘুম আসছে !

গোবর্দ্ধন । ( স্বগত ) ওরে বাপু, শালা দেখছি আমার চোদ্দ পুরুষ ! আমার ঝুলি ফাঁক হ'য়ে গেল, এক ভরি শেষ হ'ল, এখনও সবে ঘুম আসছে ! ভেবেছিলুম একেবারে সাবাড় ক'রব; এখন দেখছি এ আব্গারি ভূত উল্টে আমাদের মত গণ্ডা গণ্ডা কুচো নৈবিদ্য কাবার কত্তে পারে !

কাশিম । ( টলিতে টলিতে উঠিয়া গিয়া ) আর যাবে কোথা বিবি ; এসো—সরে বেও না ; আসান মিয়া, একটু তফাতে থাকো—

( বাসন্তীর হস্ত ধারণের চেষ্টা । )

দ্বিতীয় অঙ্ক ]

বীরপূজা

[ পঞ্চম দৃশ্য

বাসন্তী । দীননাথ, কোথায় তুমি ! ( ছুটিয়া ভীমাতীরস্ব দ্বারে  
দাঁড়াইয়া ) মাগো, আমার কোল দাও ! ( ভীমা মধ্যে বাম্পপ্রদান । )

গোবর্দ্ধন । ( ছুটিয়া আসিয়া ) হুম্মন ! ( কাশিমকে আঘাত করণ  
ও কাশিমের পতন । )

নেপথ্যে—দীননাথ !

গোব । যাঃ—সব মতলব ফক্রে গেল !

[ ভীমা মধ্যে বাম্পপ্রদান ।

পটক্ষেপণ ।



# তৃতীয় অঙ্ক ।

## প্রথম দৃশ্য ।

জেহানারার গৃহের সম্মুখ ।

রঘুনাথ ও সরযু ।

রঘু । শাজাদী কোথায় ?

সরযু । বাদশার মহলে ।

রঘু । বাদশা যে আজ দরবার করেন নি ?

সরযু । বলতে পারিনে, বোধ হয় শরীর ভাল নেই ।

রঘু । তবে আমাকে রংমহলে আসতে কে ছকুম দিলে ?

সরযু । আমার ছকুম ।

রঘু । তোমার ছকুম ? তুমিও কি একটা কেঁট বিষ্ট,র মত হয়েছ  
নাকি ?

সরযু । আপনি আমায় কি ঠাওরান ? ছকুম টুকুম দেখে বুঝতে  
পাচ্ছেন না লোকটা কে ?

রঘু । বোল্ চালাগুনো বাদশার মেয়ের মত বেশ ছরস্ত করেছে ।

সরযু । আমি যে ক্ষুদ্র বাদশা ।

রঘু । এখন এ অধীনকে তলব করা হয়েছে কি জগ ?

সরযু । ছোটো কথা কবার সাধ হয়েছে ; বল্ছিলুম্ কি, এ যোগলের  
ঘরে আর কত দিন অতিথি হয়ে থাকবেন ?

রঙ্গ । যত দিন বিধি মাপিয়েছেন ।

সরযু । বিধি যদি চিরদিন মাপিয়ে থাকেন, তা'হলে চিরদিনই কি এদের গোলামী করবেন ?

রঙ্গ । তা ভিন্ন উপায় কি ?

সরযু । কথাটা কি বুঝমানের মত হ'ল, হিন্দুর মত হ'ল ?

রঙ্গ । সব বুঝছি ; কিন্তু উপায় নেই ; আমার শিরায় শিরায় রাজ্যলালসা জড়িত ! সরযু, রাজ্য আমার প্রাণ—রাজ্য আমার সর্বস্ব !

সরযু । রাজ্য পাবার আর কি ভরসা আছে ?

রঙ্গ । বাদশা বলেন আছে । কেনি প্রকারে রাজারামকে বধ কত্তে পাল্লো দাক্ষিণাত্য আমারই নাম গান করবে ।

সরযু । তাদের প্রতাপ কি বাদশা আগে আগে বুঝতে পাচ্ছেন না ? তাঁর সৈন্যদের যে সাত ঘাটের জল খাইয়ে ছাড়ছে ; একেবারে নাস্তানাবুদ করে তুলেছে, ফৌজ মহলে একটা হলস্থল পড়ে গেছে !

রঙ্গ । তা পড়ুক ; কিন্তু একটা পাতা ছিঁড়ে কে কবে কানন নিষ্পত্ত কত্তে পেরেছে ?

সরযু । আমি বালি, হিন্দুর ছেলে কোন্খা কাবাবের গন্ধ না শুঁকে দেশে গেলে ভাল হয় না ?

রঙ্গ । যাব সরযু, একদিন যাব—হয় রাজ্যোন্মত্ত হয়ে, নয় ভিক্ষুক হয়ে । সে দিন আর বেশী দূরে নয় ।

সরযু । এখনও সেই স্বপ্ন, সেই ছুরাশা !

রঙ্গ । ওকথা ছেড়ে দাও সরযু ; রংমহলে যদি এলুম, বাদশাজাদীর সঙ্গে একবার দেখা হবে না ?

সরযু । কিছু বলবার আছে ?

রঙ্গ । কিছুনা—খালি দেখা মাত্র ।

সরযু । সে দেখা সরযুকে দেখলে হয় না ? আর শাজাদীকে কেন ?

রঙ্গ । শাজাদীকে দেখা চোখের দেখা মাত্র, সরযুকে দেখা প্রাণে প্রাণে ।

সরযু । রোগে ধরেছে ?

রঙ্গ । খালি আমার—তোমার নয় কি ?

সরযু । আমি শাজাদীকে খবর করিগে, আপনি অপেক্ষা করুন ; ভয় করবেন না, রংমহলে নানা রকম পেত্নী বেড়ায়, যেন ষাড়ে চাপে না—আমি চল্লাম । [ সরযুর প্রস্থান ।

রঙ্গ । সৌন্দর্যের সঙ্গে মধুরতার সন্মিলন কি সুন্দর, কি প্রাণ-বিমোহন ! এমন নারী যার পার্শ্ব আলো করবে তার জন্ম সার্থক, জীবন সার্থক । কিন্তু কি অসমসাহসিকতার কার্য্য করি ! যদি যুগাক্ষরে প্রকাশ পায় যে রংমহলে আমার অবারিত দ্বার, তাহলে কাঁধের উপর থেকে মাথাটি একেবারে ধড়্ ফড়্ করে করে মাটিতে গে পড়বে, আর জোড়া দেবার লোক থাকবে না ! না—এ ডঃসাহসের কাজ আর করবো না । (দূরে বাদশাকে দেখিয়া) ভগবান্, আর কত্বেও দিলে না, ঐ সম্রাট !

[ খোজার সঙ্গে আলমর্গীরের প্রবেশ ]

আল । বেয়াদব, তুই কি করে রংমহলে প্রবেশ করি ?

রঙ্গ । জাঁহাপনা ! মাপ কর্কেন—এ প্রশ্নের উত্তর দিতে গোলাম অক্ষম ।

আল । কি—আমার হুকুম্ তুই বলবি নে ?

রঙ্গ । জাঁহাপনা আমার প্রাণদণ্ড করুন, তাও সহ করবো, কিন্তু আমার কোন কথা জিজ্ঞাসা করবেন না ।

আল। রজনাত, তোমাকে বড় স্নেহ কর্তুম্, অনুগ্রহ কর্তুম্।  
সে স্নেহ রাখতে দিলে না, সে অনুগ্রহ নিতে জানলে না। অকৃতজ্ঞ  
নরাদম, খুব কৃতজ্ঞতা দেখিয়েছ, এখন তার ফল ভোগ করো। ( খোজার  
প্রতি ) এই দণ্ডেই একে কারাগারে নিয়ে যাও। [ সকলের প্রস্থান।

[ সরযু ও জেহানারার প্রবেশ ]

সরযু। বাদশাজাদি, আপনি ভিন্ন হতভাগিনীর কেউ নেই।  
আপনার অনুগ্রহভিখারিনী হয়ে এসেছিলুম, যথেষ্ট অনুগ্রহ পেয়েছিলুম।  
বিধাতা আমায় বিক্রম, এইবার আমার সব আশা ফুরল ; স্বামীর প্রাণদণ্ড  
হবে শাজাদি, সরযু পাগালনী হয়ে পথে পথে কেঁদে বেড়াবে ! দিল্লীখরীর  
পাজা পেলে, হয়ত এখনও সে তার স্বামীকে রক্ষা করতে পারে। দয়া করুন  
শাজাদি !

জেহা। দয়া সরযু ! যদি আমার বুক চিরে রক্ত দিলে তোমার  
স্বামী মুক্ত হয়, এখনই তা দিতে প্রস্তুত আছি। কিন্তু তুমি বাদশাই  
তক্তের নিয়ম জান না। জেহানারা এখন রংমহলের কুকুরী তুলা, তার  
পাজার আর কোন মূল্য নাই। বাদশার আদেশ এতক্ষণ চারিদিকে  
জাহির হয়ে গেছে।

সরযু। তবে—তবে—কি হবে ? কোথা যাব, কি করব ? প্রভু,  
স্বামি, আমার সর্বস্ব—যতক্ষণ প্রাণ আছে, ততক্ষণ তাঁর রক্ষার চেষ্টা  
করবো। চল্লাম শাজাদী ! [ সরযুর প্রস্থান।

জেহা। খোদা, কি করে !

[ আলমগীরের প্রবেশ। ]

জেহা। এ কি ! এরূপ অসময়ে দিল্লীখর বাদীকে ত কখন স্বরণ  
করেন না ?

আল । আবশ্যক হ'লেই কতে হয় । জেহানারা, তুমি আমার কে ?

জেহা । আলমগীর বাদশার ভগ্না—দিল্লীখরের বাদী ।

আল । ধন দৌলত পদমর্যাদা প্রভৃৎ সম্মান—তোমার কোন জিনিষের অভাব রেখেছি কি ?

জেহা । না সম্রাট, আপনার অনুগ্রহে আমি রংমহলের সর্কসম্বী ।

আল । তাই বৃদ্ধি এমন কোন অনুগ্রহের সদাবহার কচ্চ ?

জেহা । বাদীর কসুর কি সম্রাট ?

আল । কসুর ভেবে ঠিক পাচ্চ না ? রংমহল এত উচ্ছৃঙ্খল কেন ? দিল্লীর বাদশার অস্ত্রপুরের কলঙ্কনির্বোধে দিগ্দিগন্ত বিঘোষিত কেন ? হিন্দুস্থানে আমার মুখ দেখাবার স্থান নাই কেন ?

জেহা । এ সংবাদ অল্প পৌরাণিকদের জিজ্ঞাসা করবেন, এ সংবাদ আপনার কন্ঠানের জিজ্ঞাসা করবেন ।

আল । তুমি কিছু জাননা ? কোন সংবাদ রাখনা ?

জেহা । আমার সংবাদ রাখা না রাখা তুল্য কথা । পৌরজনেরা আমার আজ্ঞানুবর্তিনী হ'লে, দিল্লীখরের অস্ত্রপুর হতে আজ এই গরলের উচ্ছাস প্রবাহিত হত না ।

আল । তোমার কোন দোষ নাই ?

জেহা । এ প্রশ্নের উত্তর দিতে হ'লে আত্মপ্রশংসা কতে হয় ।

আল । কি—আত্মনাথ প্রকাশনের জন্য সমস্ত পৌরজনের অবমাননা করা ? পাপিষ্ঠা, ধর্মের দিকে চেয়ে জবাব দে ; সত্যের পানে চেয়ে জবাব দে ; খোদাকে ভেবে জবাব দে !

জেহা । ধর্মের দিকে চেয়ে বল্চি সম্রাট, সত্যের পানে চেয়ে বল্চি সম্রাট, খোদার নাম নিয়ে বল্চি সম্রাট—আপনার রংমহল উৎসন্ন যাবে, আপনার সাম্রাজ্য রসাতলে যাবে ! যেখানে এত অদম্য, সেখানে কখন

মঙ্গল হয় না। হতে পারে আমি অপরাধিনী, কিন্তু সম্রাট, একের পাপে কি সমস্ত রংমহল কলুষিত হয়ে ওঠে? একের অধর্ম্যে কি হিন্দুস্থানের বাদশার মুখে কলঙ্ককালিমা লেপিত হয়? কেবল আমি দোষী, আর রংমহলের সবাই নির্দোষ?

আল। এখনও প্রতারণা! পাপিষ্ঠা তুই দিল্লীখবের সহোদরা, চন্দ্র সূর্য্য তোমার মুখ দেখতে পায় না। আর একটা জঘন্ত কাফের রঙ্গনাথ কার ছকুমে তোমার মহলে আস্ত?

জেহা। আমার ছকুমে।

আল। তবুও তুই নির্দোষ?

জেহা। সে তার স্ত্রীর কাছে আস্ত?

আল। পাপিষ্ঠা, এখনও মিথ্যা কথা? পাপের উপর এখনও পাপ সঞ্চয়? এখনও অধর্ম্মের পথে প্রলোভন? ধর্ম্মনাম একেবারে হৃদয় থেকে মুছে ফেলেছিঁস?

জেহা। ধর্ম্মের ভয় দেখিও না সম্রাট! যদি দুনিয়ায় কেউ অধর্ম্মের অবতার থাকে, সে দিল্লীর বাদশাহ আলমগীর। যদি অধর্ম্মই কারো জীবনের একমাত্র লক্ষ্যমূল হয়, সে আলমগীর বাদশাহের। মোগল-সাম্রাজ্যের অধঃপতন হবে তোমার অধর্ম্মে! মহাপ্রাণ আকবর বাদশাহের কলিজার অস্থিতুল্য আদরের সামগ্রী আর্ধ্যাবর্তের এই বিপুল সাম্রাজ্য, কার বুদ্ধিহীনতার বারিমণ্ডলে বুদ্ধদুল্য বিলীন হয়ে আসছে তাকি বুঝতে পাচ্চ না সম্রাট?

আল। আমার অধর্ম্মে? আমার অধর্ম্মে?

জেহা। হাঁ তোমার অধর্ম্মে! শতবার বল্বে তোমার অধর্ম্মে, সহস্রবার বল্বে তোমার অধর্ম্মে, লক্ষবার বল্বে তোমারই অধর্ম্মে! আজ হিন্দুস্থানের এক প্রান্ত হতে অন্য প্রান্ত পর্য্যন্ত গগনভেদ করে, ক্রন্দনের রব উঠেছে—

এ কার অত্যাচারে ? তোমার অত্যাচারে নয় কি সম্রাট ? কাবুল থেকে উড়িয়া—হিমালয় থেকে বেয়ার আমেদনগর পর্য্যন্ত, হিন্দু মুসলমান এক উদ্দেশ্যে গঠিত হয়ে জাহাঙ্গীর শাজাহানের সোণার সাম্রাজ্য চূর্ণ বিচূর্ণ কতে আসছে—এ কার অত্যাচারে ? তোমার অত্যাচারে নয় কি সম্রাট ?

আল। শয়তানি, প্রাণের ভয় রাখিস্ না ?

জেহা। প্রাণের ভয় ! তোমার রাজ্যে বাস করে কবে কে নিশ্চিন্ত হয়ে ঘুমতে পেরেছে ? প্রভাতে বাকে দেখেছি, রাত্রে শুনি ছানিয়া থেকে সে জন্মের মত সরে গিয়েছে। তোমার সাম্রাজ্যের মূলমন্ত্র অবিশ্বাস, তোমার জীবনের মূলমন্ত্র অধ্যয়, তোমার সফলতার মূলমন্ত্র সংশয়। এই তিন নিয়ে তোমার সাম্রাজ্য, এই তিন নিয়ে তোমার অস্তিত্ব, এই তিন নিয়ে তোমার উচ্ছেদ !

আল। পাপিষ্ঠা ! মোগল-সাম্রাজ্যের উচ্ছেদ অসম্ভব। আলমগীর যে সাম্রাজ্যের ভিত্তি ছানিয়া ব্যাপ্ত করে যাচ্ছে, সে সাম্রাজ্য অবিদ্যমান, অক্ষয়।

জেহা। ভূগ—ভূগ—ভূগ বুঝেছ সম্রাট, ভূগ ধারণা করেছ ! এক লক্ষ নরনারীর শোণিতসিক্তপ্রাণিত করে যে সাম্রাজ্যের প্রতিষ্ঠা ; শত শত আত্মীয়স্বজনের মুণ্ডের উপর যে সাম্রাজ্যের সোপানগঠন, পিতা, ভ্রাতা, ভগ্নী, ভ্রাতৃপুত্রের অস্থি চক্ষে যে সাম্রাজ্য প্রাচীরবন্ধ, তিন দিনেই তার উচ্ছেদ হবে। রক্তের সমুদ্রের উপর তোমার সাম্রাজ্য ভাসছে—অধ্যক্ষের বাতাসে তা টলমল ক'চ্ছে, এই সাম্রাজ্যের দম্ব ক'র ? আলমগীর, একবার মনে ভেবো, খোদা আছেন ; এ বিশ্বের একজন সৃষ্টিকর্তা আছেন ; তুমি যথেষ্টচারী—তিনি যথেষ্টচারী নন। তোমার অধ্যক্ষের সাম্রাজ্য—তার অধ্যক্ষের সাম্রাজ্য নয়। সেখানে অধ্যক্ষের বিচার হয়—অধ্যক্ষেরও বিচার হয় ; পাপের বিচার হয়—পুণ্যেরও বিচার হয় ; তোমারও সেখানে বিচার হবে।

তৃতীয় অঙ্ক ]

বীরপূজা

[ দ্বিতীয় দৃশ্য

তার হাত কখনও এড়াতে পারবে না—কখনও এড়াতে পারবে না—  
কখনও এড়াতে পারবে না ! [ প্রস্থান ।

আল । কি এ, কি এ ! পাঁপিচা এ কি বলে গেল ? আমার চক্ষের  
উপর এ কি দেখিয়ে গেল ! আমার আপাদমস্তক বিকম্পিত করে কি  
ধর্মের আলোক প্রজ্জ্বলিত করে গেল ! ধর্ম ধর্ম ! কৈ ধর্ম—  
কোথায় ধর্ম ! আলমগীর বাদশা অতি দীন, অতি মন্দভাগা ! কৈ ধর্ম—  
কোথায় ধর্ম ! [ প্রস্থান ।

## দ্বিতীয় দৃশ্য ।

কারাগারের সম্মুখ ।

প্রহরী ।

প্রহরী । ( পদচারণ করতে করিতে ) না, নসীবটে বড়ই বেয়াদা  
দেখছি ! এ ছাট পাহারাগিরিও যুচবে না ; ফুঁটি করবার একটা লোকও  
জুটবে না । দিন রাতই কি এই জেলখানার কড়ি গুণে কাটবে ! কি  
করবো—বরাত ! আর বাদশার আক্কেলটা দেখ দেখি ! আমার মত  
সমজ্জদার তালিম্দার হাঁসয়ার জোধান আদমীকে সেনাপতি না করে কল্লে  
কি না একটা পাহারাওয়াল । মাসহারা যা পাই, তাতে এক বেলা আধ  
পেটও কুলোয় না । হাড়ভাঙ্গা মেহন্নত, তার ওপর সিকি পেট খাওয়া,  
এতে দেহ যা হয়ে পড়েছে, কোন্ দিন দেখছি প্যাকাটির মত পট করে  
ভেঙ্গে পড়বে ।



[ জুড়িদারবেশে গোবর্দ্ধনের প্রবেশ । ]

গোবর্দ্ধন । তোঁর ভেঙ্গে পড়বে—আমার পড়েছে ।

প্রহরী । কে বাবা, নূতন মুখ দেখ্ছি যে !

গোব । কি ক'র দাদা ! দি'বা থাকা গিছিলো ; দরবারে পাহারাগিরি কত্তুম্, খাটনি খুটনি কিছু ছিল না । ছ'চার দিন অন্তর দরবার বসলে, ছ'এক ঘণ্টা গোঁফ চুম্বরে গলা ফুলিয়ে সবাইকে চোক্ রাঙাতিম্, বাদশার আগে আমাকেই সব সেলামবাকী কর্তা । আমি'র ওমরাহদের কাছে বেশ ছ'পরমা পাওয়াও যেত । শালার সেনাপতির তা গঠল না, বেটা তার শালীপতির সম্বন্ধীর খুডতুতো ভাইকে আমার যায়গায় বসিয়ে দিয়ে আমাকে সে কাজ থেকে বরতরফ করে দিলে ! আজ থেকে আমাকেও ভাই তোঁর মত জেলখানা কাঁট দিতে হবে ।

প্রহরী । ভাইতো দাদা, তোঁর হাল্টাও দেখ্ছি কতকটা আমারই মত ! আমারও একটা জাঁদরেল রকম কাজ হ'লে ততো ফস্ক গেছে । নসীব, দাদা, নসীব !

গোব । ঐ যা বলি ভাই ! আর জন্মে আমরা বোধ হয় দুই সহোদর ছিলুম্ । যা চোক্ ভাই, তুই ত এখন বাসায় গিয়ে চোদ্দ পো ভাব ; আর আমার এই মাসের তাড়ভাঙ্গা শেতে হি'চ কন্তে হবে । একটু গাঁজা টাঁজা কিছু আছে কি দাদা ? তা' ও'লে শরীরটে একটু চাঙিয়ে নিই ।

প্রহরী । গাঁজার গন্ধও নেই ভাই । ( গোবর্দ্ধনের বগলে বুচ্কি দেখিয়া ) তোঁর ও বুচ্কিতে কি ?

গোব । কিছু নয় ভাই, একপানা ছেঁড়া কস্থল । দেহটাকে তো রক্ষা কর্তে হবে, নৈলে কাল সকালে যে জমে থাকনো ।

প্রহরী । তবে ভাই আমি এখন লম্বা দিই ?

গোব । আচ্ছা দাদা ।

[ প্রহরীর প্রস্থান । ]

এইবার দিদি এলেই হয় । ছেঁড়া কম্বলখানা বের করে রাখি । ( বুচ্‌কি হইতে প্রহরীর পরিচ্ছদ বাহির করণ । )

( সরযুর প্রবেশ । )

এই নাও দিদি, মোগল-পাঠারার পোষাক নাও ।

সরযু । কি করে যোগাড় কল্লে গোবর্দ্ধন ?

গোবর্ধন । হুঁ হুঁ—দি'দ, গোমার কুপার আমি তো আর সেই ভোলানাথ নই ! বোনাই বাবুকে সেপাই সাজাব বলে, মোগল শিবিরের সেপাই সাহেবকে কোত্রল করে আসা গেল । এখন যাও দিদি, শিগুঁগির শিগুঁগির কাজ হাঁসিল করে ফেল ; আমিও আমার দলে ভিড়িগে । [ প্রস্থান ।

## কোড়াক ।

কারাগারের অভ্যন্তর ।

রঙ্গনাথ ।

রঙ্গ । হৃৎকম্পের এই পরিণাম ! মহাপাতকের এই প্রায়শ্চিত্ত ! বড় উচ্চ আশা করেছিলুম ; রাজা-লালসায় বড় উন্নত হয়েছিলুম ; তার ফল এই হোল ? রাত্রি তৃতীয় প্রহর অতীত ; এখন সকলের সামনে মুসলমানের হাতে ম'ত্তে হবে । উঃ কি অপমান ! প্রবলপ্রতাপ মহারাষ্ট্রবংশে জন্মগ্রহণ করে আজ কি ঘণ্যভাবেই আমার জীবনের পর্যাবসান হচ্ছে !

[ সরযুর প্রবেশ । ]

কে সরযু, তুমি এসেছ ?

সরযু । হাঁ, এই নিন্, প্রহরী সঙ্গে বেরিয়ে যান্ । ( পরিচ্ছদ দান । )

রত্ননাথ । সরযু ! তুমি আমার কে ? এই বান্ধবশূন্য সংসার-পারাবারে  
তুমি আমার কে ?

সরযু । কেউ নই প্রভু ! সামান্য দাসী ।

রত্ননাথ । আমাকে বাঁচাবার জন্য নিজেকে বিপন্ন কচ্চ কেন সরযু ?

সরযু । আপনি মুসলমানের বন্দী বলে ।

রত্ননাথ । তবে তুমি কেন মুসলমানের বাদী হ'য়ে আছ ?

সরযু । আর থাকবো না ।

রত্ননাথ । যাবে কেমন করে ?

সরযু । রাত্রে রংমহলের বাইরে যাবার আমার হুকুম আছে ।

রত্ননাথ । কোথায় যাবে সরযু ?

সরযু । তা জানি না, আপনি চ'লে আসুন ।

রত্ননাথ । সরযু, তুমি দেবী না মানবী ?

[ উভয়ের প্রস্থান ।

## তৃতীয় দৃশ্য ।

ভীমা-তীর ।

বাসন্তী শায়িতা পার্শ্বে সরযু ।

সর । কষ্ট হচ্ছে কি মা ?

বাস । না মা ; কষ্ট নয় ।

সর । তবে চোখ দিয়ে জল পড়ছে কেন ?

বাস । কি জানি কেন, বুঝি তোমার জন্ত, বুঝি তোমায় ছেড়ে যেতে হবে বলে ।

সর । আমার জন্ত দুঃখ কেন মা, চোখে জল কেন ?

বাস । না মা, দুঃখ নয়, এ অশ্রু—অনন্দ অশ্রু ।

সর । পাগলি, এত কোরেও গোকৈ যে বাঁচাতে পার্লাম না, এ ক্ষোভ যে আমার মলেও যাবে না !

বাস । ক্ষোভ কি ? দুঃখ কি ? দীননাথকে ডাক ; তিনিই সকল দুঃখ দূর করবেন । অঃ—কি ঠাণ্ডা বাতাস ! মা মা, দেখতে পাচ্চ—ঐ—ঐ, কে আমায় ডাকচে ! কি রূপ—কি রূপ, চক্ষু জুড়িয়ে গেল ! ( নিদ্রা । )

সর । আতা ! বুঝি একটু ঘুমালো । বাণিকা কি পবিত্র, কি পুণ্যময়ী ! যথার্থই ও দীননাথকে চিনেছিল । আতা—বাছার এই পাঠগাম ! ঘুমুচ্ছে—একটু বাতাস করি ।

[ রঙ্গনাথের প্রবেশ । ]

রঙ্গ । (স্বগত) কোথায় যাই ! আজ সাত দিন বনে বনে ফির্ছি । এতো নির্জন স্থান নয় । নদীর ধারে কুটীর দেখা যাচ্ছে । তবে কি লোকালয়ে এসে পড়লুম ? যদি কেউ দেখে ? না খেয়ে, এই দীনবেশে ঘুরে ঘুরে বেড়াচ্ছি, আর ত পারি না ! আর চলবারও শক্তি নেই । খুব রাজ্য পেয়েছি ! নারায়ণ ! না, ও নাম নয় ; ও নাম করবার অধিকার আমার নেই । তবে—তবে, কি করি ? কোথায় গিয়ে প্রাণ রক্ষা করি ? কে আমার আশ্রয় দেবে ?

বাস । ( নিদ্রাবস্থায় )—আমি দেবো ?

রঙ্গ । কে—কে—কেও ? আশ্রয় দেবে বলে কে আশ্বাস দিলে ? কথা কও—চুপু কলে কেন ?

সর। ( বাসন্তীর প্রাতি ) কি মা, কি বল্ছো ? কৈ না—এখনও যুম্ছে। ( রঙ্গনাথকে নিকটে দেখিয়া ) কে ও ?

রঙ্গ। তুমি কে ? কে—সরয়ু ! তুমি এখানে ! তুমিই কথা কাচ্ছলে ?

সর। না, যে কথা কচ্ছিল, সে এই শুয়ে। দেখ, চিন্তে পার ?

রঙ্গ। ( দোখিয়া ) কে বাসন্তী ! না মা, তোমার এমন দশা হয়েছে !

সর। হাঁ—হাঁ—বালিকা মৃত্যুর পথে যাবার জন্য প্রস্তুত হয়েছে। একটু ঘুমিয়েছে—ডেকেনা।

বাস। কে, বাবা ? আর ভাল দেখতে পাচ্ছনা ; সব স্বাপ্না বোধ হচ্ছে ! একটু পায়ের ধূলা দাও ; আশীর্বাদ কর যেন দীননাথের চরণে স্থান পাই।

রঙ্গ। মা—মা—বাসন্তু, চলি ? আমিই গোর এ দশা করেছি ; আমিই তোকে মেরে ফেল্লাম !

বাস। না বাবা, তুমি কেন ? তুমি ভালই করেছ। বাবা, আমি চল্লাম ; না, যাই ! ( মৃত্যু )

সর। বা—সব ফুরালো !

রঙ্গ। ফুরালো—ফুরালো—সব শেষ হলো ! না মা—আমিই তোকে মেরে ফেল্লাম। কি হবে, কি হবে ! না বড় কষ্ট পেয়েছো ! কি কল্লাম—কি কল্লাম ! বালিকা হত্যা কল্লাম, নান্দনী হত্যা কল্লাম, নারী হত্যা কল্লাম ! হঃ—হোঃ—হোঃ ( মূচ্ছিতপ্রায় হঠাৎ পড়ন )

সর। কি করে হত্যা করেছ তা জান ? কি কষ্ট পেয়ে বালিকা মরেছে তা জান ? সেনাপতির হাত থেকে রক্ষা পাবার জন্য ভীমার জলে ঝাঁপ দিতে গিয়ে, বাছার আমার আঁত পঙ্কর চূর্ণ হয়ে গিছলো। তিল তিল করে মৃত্যু-ঘন্ত্রণা সহ করেছে, কিন্তু তবু একদিনও তোমার দোষ দেয় নি ; দীননাথকে ডেকেছে—বলেছে, তোমার মঙ্গল হোক। বাসন্তীকে মেরে শুধু বালিকা হত্যা কল্লাম—মাতৃহত্যা কল্লাম।

রঙ্গ । ঠিক বলেছো—ঠিক বলেছো ! তুমি এ বালিকার কে সরয়ু ?

সর । কেউ নই ।

রঙ্গ । তুমি কে ? তুমি নিরাশ্রমকে আশ্রম দাও, আমার মত  
নরপিশাচকে মৃত্যুরক্ষ্মথ থেকে বাঁচাও—তুমি কে ?

সর । আমি কে তা শুনবে ? বলবো—আজ সে কথা বলবো ;  
এই অনন্ত বিজন মনো, অনন্তময়ের অঙ্কশায়িতা বালিকার সম্মুখে, যে কথা  
এতদিন বলি বলি করেও বলতে পারিনি, আজ সে কথা বলবো । আর  
চেপে রাখতে পারিনে ! প্রভু আমি তোমার পত্নী, আমি তোমার সহধর্মিণী,  
আমি তোমার জীবন-মরণের সঙ্গিনী ।

রঙ্গ । সে কি ! এক কথা সরয়ু—

সর । প্রভু কর্ণাটের জায়গীরদারকে মনে পড়ে ? আমি তাঁর কন্যা  
লক্ষ্মীবাই । আমার ছদ্মবেশের নাম সরয়ু । তুমি আমায় বিবাহ করেই  
পরিত্যাগ করেছিলে, জীবনে কখনও আমার মুখ দর্শন করনি । তুমি  
আমায় ভুলে ছিলে, কিন্তু আমি তোমায় ভুলতে পারিনি । তোমায়  
দেখবার জন্য ভিখারিণী বেশে তোমার আশে পাশে ঘুরে বেড়াইতুম ।  
শত্রুকন্যা বলে তুমি আমায় ত্যাগ করেছিলে ; পাছে চিন্তে পাল্লি আর  
না দেখতে পাই, সেই ভয়ে কখনও তোমায় পরিচয় দিই নি । তুমি  
আমায় দেখেও দেখনি । তুমি না দেখ, আমি তোমায় প্রাণভরে দেখেছি ।  
মোগলেরা আমার পিতাকে হত্যা করে । পিতৃমৃত্যুর প্রতিশোধ নেবার  
জন্য আমি দিল্লী যাই । তারপর ত তুমি সব জান ।

রঙ্গ । জানি, জানি—সব জানি । মহাপাতকী আমি—আমার  
মাথায় এখনও বজ্রাঘাত হচ্ছে না, লান্স—লান্স—

সর । স্থির হও প্রভু !

রঙ্গ । রাজ্যলালসায় উন্মত্ত হয়ে কিনা করেছি ; নিজের মঙ্গলঘট

নিজের পদাঘাতে চূর্ণ করেছি ! ওঃ—জালা—জালা, জালার সমুদ্রে আমি ডুবে রয়েছি ; লক্ষ্মি, একটা কথা বলি—অধিকার না থাকলেও বলি—তুমি আমার ভুলে যাও !

সর । ওকি কথা প্রভু ?

রঙ্গ । আমি তোমার অযোগ্য স্বামী । পত্নী বলে তোমায় গ্রহণ করি, সে অধিকারও আমার নেই ।

সব । না প্রভু, এখন তুমি বিপদমুক্ত । ঐ বালিকার মৃত্যুফলিত মুখমণ্ডল বোধ হয়, তোমার ভবিষ্যৎ জীবন নূতন আদর্শে গঠিত করবে । আর আমি এখানে থাকবো না । এখনও আমার অনেক কাজ বাকি । ঐ পিতার অশরীরী আত্মা বলছে—প্রতিশোধ, প্রতিশোধ ! তোমার জন্ম সে কথা ভুলেছিলেন । কেন না, তুমি আমার ইষ্টদেবতা অপেক্ষা, আমার পিতার অপেক্ষা শ্রেষ্ঠ ; তুমি আমার স্বামী, আমার সক্ষম, আমার ইহকাল পরকাল । তুমি বিপদমুক্ত, আর আমি এখানে থাকবো না !

[ প্রস্থান ।

রঙ্গ । লক্ষ্মি, লক্ষ্মি—যেহা না ; আমায় ফেলে যেয়ো না ! কৈ, কোথায় গেলে—আর দেখতে পাই না ! লক্ষ্মি—লক্ষ্মি, অন্ধকারে মিশিয়ে গেলে ! কোথায় খুঁজবো ? ভগবান্, আর কেন ? আর জীবন ধারণে ফল কি ? কি আশায় বাঁচবো ?

( ভীমার জলে ঝম্পাচ্ছত ; হঠাৎ রাজারামের প্রবেশ ও রঙ্গনাথকে পুতকরণ ।)

রাজা । মরবে কেন ? আত্মহত্যা মতাপাপ—ফের ।

রঙ্গ । কে তুমি ? ভগবান্, আমায় কি মন্ত্বেও দেবে না ? কেন বাধা দিচ্ছ ; ছেড়ে দাও—আমি জুড়ুই ।

রাজা । বৃথা মরবে কেন ? শোন—আমি তোমায় চিনেছি । তুমি রঙ্গনাথ ।

রক্ষ । আপনি কে ?

রাজা । আমার নাম রাজারাম ।

রক্ষ । এঁা—তাই কি, এক স্ত্রী না প্রহেলিকা ?

রাজা । কিছুই নয়—সত্য ।

রক্ষ । আমি আমার স্বর্গাচার প্রাণ যে অত্যাচার করেছি, তা বোধ হয় দানবেও কল্পনা করতে পারে না ; আপনি কি তাই স্বহস্তে আমায় বধ করে প্রতিশোধ নেবেন ?

রাজা । হি, ও কথা বলতে নেই ! মন্ত্র জিহ্বা বিস্তার করে অনুশোচনার বাহু তোনার অন্তরে জ্বলে উঠেছে । আর কি তোমার উপর কেউ রাগ করতে পারে ?

রক্ষ । উঃ—বৃশ্চিক দংশন - বৃশ্চিক দংশন ! ঐ দেখুন—আমার ছক্কতির জ্বালাময় চিত্র দেখুন ? ঐ বালিকা দম্মপ্রাণা চিরপুণাময়ী ; রাজালাভের আশায় বাছাকে আমি অকাতরে মুসলমানের হাতে তুলে দিই । তাদের হাত থেকে রক্ষা পাবার জগু মা আমার মরেছে । আমি এ স্মৃতি নিয়ে বেঁচে থাকতে পারবো না ! দেব, আমায় ভাগ করুন ।

রাজা । রক্ষনাথ, তোমার মুখে এ কথা শোভা পায় না ; ঐ বালিকার মৃত্যুর কারণ বলে তুমি অনুগণ কচ্ছ, কিন্তু ঐ বালিকারই অনুরূপ মহারাষ্ট্র আমার অহংকঃ অশ্রুজলে ভাসছে । মাঘের সে অশ্রু না মুছিয়ে মরবে ? কাপুরুষের শ্রায় মরবে ? এস, মাতৃকার্যো সব শক্রতা ভুলে আজ আমরা পরম মিত্র হই । এসো, কোল দাও ।

[ উভয়ের আলিঙ্গন ।

পটক্ষেপণ ।



# চতুর্থ অঙ্ক ।

## প্রথম দৃশ্য ।

দুর্গমনিধানস্থ পথ ।

রজনাপ ।

রজনাপ । (স্বগত) কে এ রাজ্যগ্রাম ! এঁক আমাদেরই মত মানুষ !  
কৈ, কেমন করে ! যে আমার মত কৃৎসনকে মার্জনা করতে পারে,  
আমার মত কাপুরুষের পাপকার্যের ফলে যার সর্পনাশ হয়েছে জেনেও যে  
আমাকে এই গৌরবময় পদে প্রতিষ্ঠিত করেছে, মতামুখে অধিনায়কত্বের  
ভার অর্পণ করেছে—সেঁক আমার মত মানুষ ! না না, মহারাষ্ট্রপতি মানুষ  
নয়—দেবতা ! সে দেবতার করুণা পাবার উপযুক্ত আমি নই । আমার  
চারিদিক অন্ধকার ! এ অন্ধকারে আলো নেই, আশা নেই, আছে কেবল  
অনুশোচনার তীক্ষ্ণ জ্বালা ! তবে আর কেন ? এসো মৃত্যু—এসো সঙ্ক-  
সংহারক মহাকালের চিরসচ্চর্য্য বিভীষকাময়ী ছায়া—এসো অনন্তের  
কুঁকণ্ড অন্ধকার আবরণের ভীতিময় প্রাণিনী—এসো শ্মশানশিবাসক্তিনী  
নরকহালমালিনী—তোমার তুষার-শীতল-কল্পশর্পে এ জড় জীবনের ধ্বংস  
কর—এর অস্তিত্বে আর কোন প্রয়োজন নেই !

[ মারাঠা সৈনিকবেশে গোবর্দ্ধনের প্রবেশ । ]

গোব । বলি কাফের চাচা, খবর কি ?

রঙ্গ । কে তুমি ?

গোব । সে কি বোনাই, ভাল কোরে দেখ দেখি, আমি সেই বৌপালান দেওয়ানা ফকির কিনা ?

রঙ্গ । এঁা—সে কি !

গোব । কেন চাচা, ঘাবড়াও কেন ; ভেয়ে দেখনা, সেনাপতির বাড়ী মুন্সিলাসান কর্তে গিয়ে তোমার সঙ্গে দেখা হয়েছিল কিনা ? খোলশ তুমিও বোদলেছ, আমিও বোদলেছি ; কিন্তু তা বলে চেনাচিনির গোলমাল হবে কেন ?

রঙ্গ । এইবার চিনেছি ; তুমি হুম্মন—শকর চর !

গোব । চর নয় চাচা, তোমায় চরাতে এসে'ছ ।

রঙ্গ । তুমি আমার সর্বনাশ কর্তে এসেছ ? তুমি কাশিমের লোক, কৈ হায় !

গোব । হায় হায় কচ্ছ কেন বোনাই ? মানুষ চিন্তে এখনও তোমার চের দেয়ী ।

রঙ্গ । খুব চিনেছি, বেশ চিনেছি, ( তরবারি দেখাইয়া ) তোর শির নেব, অবিখাসী শয়তান !

গোব । ( সহাস্তে ) চুপ্ চুপ্, তলোয়ার খাপের ভেতর পোরো কর্তা, পোরো পোরো—ও ইম্পাতের ফাল দেখিয়ে আর আমায় ঘাল কর্তে পাচ্ছনা ।

রঙ্গ । না না, তোমায় ছাড়বো না, নিশ্চয় তুমি চর ।

গোব । তা বোলবে বৈকি খাঁ সাহেব ; কিন্তু এই চর শালা না থাকলে, রাজা সাহেবকে এতক্ষণ কন্দকাটা হয়ে বেঁড়াতে হতো । বলি

বোনাই চাচা ! জেলখানায় যদি সেপাই সেজে না ঢুকতে পারতুম, তা'হলে কে তোমায় আজ এখানে চরতে আনতো ? এইবার কি কিছু ধোঁকা লাগছে ?

রঙ্গ । ( বিস্মৃতভাবে ) হাঁ ধোঁকা লাগছে, তোমার পরিচয় দাও ?

গোব । আমার পরিচয় দেবার কিছু নেই দাদা ! পোড়া বাংলা দেশের গুলিখোর আমি, পেটের লোভে নেশার ফোঁকে ছনিয়া ঢুঁড়ে এসেছিলুম এই দেশে । অদৃষ্টের জোর ছিল দাদা, তাই পথের মধ্যে সাত রাজার ধন মিলে গেল । সে ধন তোমার বৌ, আমার দিদি ! সে ধন আমার গঙ্গা যমুনা সরস্বতী ! সে ধন আমার নিদানকালের সূচিকাভরণ ! তারই রূপায় নেশা ছাড়লুম, তলোয়ার ধল্লুম, তোমায় বোনাই বলে চিন্লুম । তারই জন্তে মৃৎকল'সান্, তারই জন্তে ছদ্মবেশ ; দিদির সব কাজই করলুম দাদা, শুধু নেয়েটাকে বাঁচাতে পারলুম না । এক রকমে বাঁচিয়েছি । সেনাপা'র হাতে না মরে, ভীমায় কাঁপ দিতে গিয়ে মরেছে । বোনাই দাদা ! এইবার একবার তলোয়ার খানা খোল !

রঙ্গ । ( গোবর্ধনকে আলিঙ্গন করিয়া ) ভাই ! কমা কর ; কিছুই বুঝতে পারিনি, কিছুই চিন্তে পারিনি । বুঝবো কি, চিন্বে কি ? অন্ধ ভাঁথি, ভ্রান্ত মন, বিকল অঙ্গ । দেখেছি ভুল, ভেবেছি ভুল, চিনেছি ভুল । এই ভুলের সমষ্টি আমি আজ মৃত্যুকে খুঁজে বেড়াচ্ছি । কই মৃত্যু, ভাই, কোথায় মৃত্যু ! কোথায় সেই লোক, যেখানে গেলে এই ভুলের মেলা ভেঙ্গে যায় ? পণ দেখিয়ে দাও ভাই !

গোব । সেই পণেট তো এসেছ দাদা । এখন চলে এসো ! আমার দশভূজা দিদি মহারাষ্ট্রপতিকে যুদ্ধক্ষেত্র থেকে সরিয়েছেন । তোমার প্রায়শ্চিত্তের এমন সুযোগ আর হবে না—শীঘ্র চল !

[ উভয়ের প্রস্থান ।

[ মারাঠা সৈন্যগণের প্রবেশ । ]

সকলে । পালা—পালা—ঐ মোগলেরা আসছে ।

১ম সৈ । আবার পেছন দিকে চায় ?

২য় সৈ । আমার ভাগেটা পেছিয়ে পড়েছে—তাই দেখছি ।

১ম সৈ । তবে দাঁড়িয়ে মর ! : যে যার আপনার প্রাণ বাঁচা, ভাগের  
খবর ভাগে নেবে ।

[ লক্ষ্মীর প্রবেশ ও পথ অনরোধ করণ । ]

লক্ষ্মী । কোথা যাও ?

সকলে । এ কে ?

১ম সৈ । ছাড় ছাড়, পথ ছাড়, যেতে দাও—শত্রুর চর নাকি ?

লক্ষ্মী । না, আমি তোমাদের ঘরের মেয়ে—পালাচ্চ কোথা ?

২য় সৈ । তা তা—তা জানিনে—

লক্ষ্মী । কেন পালাচ্চ ?

২য় সৈ । প্রাণের ভয়ে, আর কেন ? মোগলেরা মহামার আরম্ভ  
করেছে ; মহারাষ্ট্র শ্মশান হ'ল !

লক্ষ্মী । মহারাষ্ট্র শ্মশান হ'ল, আর তোমরা পালাচ্চ !

২য় সৈ । তা কি ক'রবো—শুধু দাঁড়িয়ে মাথা দেব ?

লক্ষ্মী । পালিয়ে প্রাণ বাঁচাবে ঠিক ক'রেছ ? যুদ্ধক্ষেত্র থেকে পালিয়ে  
আর মরবে না—কেমন ?

২য় সৈ । তা, তা—তুমি আপনি কি বলছ ?

লক্ষ্মী । কিছু না, পথ ছেড়ে দাঁচ পালাও ; কিন্তু সাবধান, খবরদার  
ম'রো না ; বনে পালিয়ে বাঘের মুখে ম'রো না । কাল নদীতে নাইতে  
গিয়ে দেখলুম, একটা সোণার চাঁদ ছেলে স্নান ক'চ্ছিল—তাকে কুমীরে

টেনে নিয়ে গেল। তার মা বাড়ীতে ভাত বেড়ে বসেছিল—ছেলে আর ফিরে খেতে এলো না! সাবধান, সে রকম কুমীরের হাতে মরো না। একদিন ঝড়ের রাতে আমি একটা মাঠ পার হচ্ছি—আমার সামনে একটা লোকের মাথায় বজ্রাঘাত হ'ল! তোমরা খুব মাথা বাঁচিয়ে চলো। যখন কড় কড় করে আকাশ থেকে বাজ পড়বে, অমনি খুব দৌড় দেবে; তা' হ'লে আর বজ্রাঘাতে মৃত্যু হবে না! আপনার ঘরে স্ত্রীর কোলে মাথা রেখে, রোগে যন্ত্রণায় ছটফট কতে কতে যখন নাভিখাস হবে, তখন দেখবো একবার দৌড় দিয়ে জরের হাত থেকে কেমন করে প্রাণ বাঁচাতে পার? যাও, পথ ছেড়ে দিয়োছি—পালাও না কেন?

১ম সৈ। এখে মা আসন্ন মৃত্যু, জেনে শুনে মরণ!

লক্ষ্মী। তাইত বল্চি—যাও—পালাও; কিন্তু এই ক্রুখিনী রমণীর একটি কথা মনে রেখো—এমন যন্ত্রণায় পালাও যেখানে সাক্ষাৎ শমন নাই।

২য় সৈ। ও সব শাস্ত্রের কথা রেখে দাওনা; যতদিন বাঁচি ততদিনই ভাল!

লক্ষ্মী। সেটা কতদিন, তাক বেশ হিসাব করে ঠিক করেছ। তোমরা চাষী লোক, ক্ষেতে চাষ কতে কতে হয়ত কারো পারে একটি ছোট কাঁটা ফুটে পারে; তাইথেকে ক্রমে সর্সান পচে ধসে যেতে পারে। তেমন করে ভোগার চেয়ে কি তরোরালের ঘায়ে মরা ভাল নয়? আলের গা থেকে একটা কেউটে বোরিয়ে, দেখতে না দেখতে ছোবল মাতে পারে; কামানের গোলার সামনে পুঙ্কষের মত ছাতি পেতে দেওয়ার চেয়ে সে মৃত্যু কি বেশী বাঞ্ছনীয়?

১ম সৈ। কি করব মা, অনবরত সাতদিন বৃদ্ধ করে আমরা অবসন্ন হয়ে পড়েছি; বাহতে আর বল নেই।

লক্ষ্মী । কিন্তু চরণে ত বিলক্ষণ বল আছে দেখতে পাচ্ছি । এই দৌড় যদি পেছন ফিরে না দিয়ে সামনের দিকে দিতে, তাহ'লে চাপে যে শত্রুকে ভূতলশায়ী করতে পারত ? আর বাহতে বল নেই বল্চো ? পালিয়ে কোথাও কি শুয়ে শুয়ে জীবন যাপন করবে ?

২য় সৈ । শুয়ে থাকলে পেট চলবে কেমন করে মা ? খাটতেই হবে—তা লাঙ্গলই ঠেলি—তাতুড়িই পিটি—আর গাছই কাটি ।

লক্ষ্মী । তবে যে বল্চো বাহতে বল মেই ? তা নয়, মহারাষ্ট্রের বীরপুত্রগণ, তা নয় ; তোমাদের বাহতে যথেষ্ট বল আছে । যে পদ পলায়নে নিযুক্ত করেছ, সেই পদভরে এখনও মেদিনী কম্পিতা হন । কেবল বল নেই তোমাদের বুক । মোগল যাদু জানে, তোমাদের যাদু করেছে ! মনের বল তাই তোমরা হারিয়েছ, জুজুর ভয়ে তাই তোমরা পালাচ্ছ । পেছন ফিরে যত ছুটবে, জুজু ততই সজ নেবে । কিন্তু জুজুর সামনে একবার বুক চিতিয়ে দাঁড়ালে জুজু তখনই মিলিয়ে যাবে । ছিঃ—মরণের ভয়ে পলায়ন !

২য় সৈ । না মা, আর পালাব না ; তুমি আমাদের যেখানে নিয়ে যাবে সেই খানে যাব ।

[ জনৈক মারাঠা সৈন্যের প্রবেশ ]

সৈন্য । সর্বনাশ হয়েছে, সর্বনাশ হয়েছে—আর কোথা যাচ্ছ তাই—মহারাষ্ট্রপতি নাই !

সকলে । সে কি—সে কি !

সৈন্য । তাঁর ছিন্ন মস্তক এখন হুরাচার কাশিমের হাতে !

লক্ষ্মী । ছিন্ন মস্তক ! বাঃ—সব চেটাই বিফল হ'ল !

সকলে । এঁরা—মহারাজ মলেন ? আর আমরা মার্বার ভয়ে পালাচ্ছিলুম ?

লক্ষ্মী । মহাপ্রাণ মহারাষ্ট্রপতি আজ দক্ষিণাত্যের ধর্মশক্তির গর্বোৎ-  
ফুল্ল পর্বত ! তাঁরই বক্ষোভেদী প্রবল প্রেমায় আজ অভিনব ভূকম্পের  
সৃচনা করেছে। এতে যদি তাঁর নখর দেহ বিনষ্ট হয়—তাতে ক্ষতি কি ?  
মহাপুরুষের মৃত্যু কখনও নিফল হয় না ; সে মৃত্যুর নাম মহাজীবনের  
সৃচনা। সে শোণিতের প্রতি বিন্দুতে কোটি কোটি রাজারাম জন্মাবে।  
ওঠো, জাগো, তাঁর মৃত্যুর প্রতিশোধ নাও ; আর ভয় কোর না !

সৈন্ত । আঃ, কে মা তুমি ? ঠিক বলেছো মা ; ভাই সব, প্রতি-  
শোধ নাও, আগুন জ্বাল, সে আগুনে দিল্লীর সিংহাসন পুড়ে ছাই হোক !

১ম সৈ । না আর ভয় নেই, বল মা আমাদের কোথায় যেতে হবে ?

লক্ষ্মী । তোমরা সকলে সেতারার দুর্গে যাও ।

সৈন্ত । তুমি কি মা আমাদের সঙ্গে যাবে না ?

লক্ষ্মী । না বাবা, আমার এখানকার কাজ ফুরিয়েছে ।

সৈন্ত । তবে কি মা আর তোমার দেখা পাব না ?

লক্ষ্মী । বলতে পারিনে ।

সৈন্ত । এখন কোথায় যাবে মা ?

লক্ষ্মী । স্বামী সকাশে ; আমার কুলশয্যা হয়নি, কুলশয্যা করতে যাব ।

[ লক্ষ্মীর প্রস্থান । ]

সৈন্ত । আর এখানে কেন ভাই সব ; চল সেতারার দুর্গে যাই,  
দেবীর উপদেশ কেউ লঙ্ঘন কোরো না ।

সকলে । জয় মা ভৈরবী ।

[ সকলের প্রস্থান । ]

[ ককির বেশে রাজারামের প্রবেশ । ]

রাজারাম । পালিয়ে এলুম ; চোরের মত, ভীকর মত ছদ্মবেশে  
পালিয়ে এলুম ! রাজবেশ পরিত্যাগ করে ককিরের কস্যার দেহ আবৃত

কল্পম্! কে সে রমণী! তার নরনে কি মোহিনী শক্তি, রসনায় কি  
ইন্দ্রজাল! ছি ছি ছি, কল্পম্ কি; পুত্র পরিবার শিষ্য সেবক সকলকে  
শত্রুর সম্মুখে রেখে প্রাণভয়ে পালানুম্! একজন অপূর্বদৃষ্টা, অপরি-  
চিতা, যোগিমৌবেশা যুবতীর কথায় মন্ত্রমুগ্ধের ন্যায় পরিচালিত তনুম্!  
না না, প্রাণভয়ে নয়, রমণীর কথাই ঠিক—আমার প্রাণ দেবার সময়  
এখনও হয় নি। লোকে আমার ভীকু বলবে, বলুক; ইতিহাসে  
কাপুরুষ উপাধি লাভ করব, ক্ষতি নাই; জগৎ হাসবে, হাসুক।  
মহারাত্ত্বের উদ্ধার সাধন, আমার জীবনের ব্রত। সে ব্রত উদ্যাপনের  
জন্য এখনও আমার জীবন রক্ষা কর্তে হবে। আমি কে? আমার মান  
অপমানই বা কি? মা ভৈরবি, নাও মা তোমার মান অপমান; নাও মা  
তোমার সুখ্যাতি অখ্যাতি; নাও মা তোমার বাসনা বিসর্জন। আমার  
বীরত্বের গৌরব, ভীকুতার লজ্জা, সকলই তুমি নাও মা! কেবল আমার  
আমার ব্রত উদ্যাপন কত্তে নাও। ইহকাল কি, আমার মহারাত্ত্বের জন্ত  
আমি আমার পরকাল পর্য্যন্ত দিতে প্রস্তুত। মা ভৈরবি, উদ্দেশ্য দেখ মা,  
আমার কার্য্য দেখো না। চল পলায়িত-চরণ, সেতারার দুর্গে চল;  
আবার মার পূজার বলি সংগ্রহ করি। উঃ—কতকাল—কতকাল আর  
এ রক্তপ্লাবন চলবে!

[ সন্ন্যাসিনীবেশে লক্ষ্মীর প্রবেশ। ]

লক্ষ্মী। কি ফকির, এখনও পথে?

রাজারাম। পথেই ত বহুকাল; ধর্ম্মশালা ত অনেক দিন অন্বেষণ  
কচ্চি—পাচ্চি না। বুঝি এ পথ অনতিক্রমণীয়।

লক্ষ্মী। সে দিন শুনলুম্ তোমার পাছশালা অন্বেষণের কষ্ট দেখে সদয়-  
করম কাশিম খাঁ তোমায় একেবারে দেশে পাঠিয়ে দিয়েছে।



রাজা। প্রহেলিকা ভেঙ্গে দাও মা ; তোমার কথা বৃক্তে পাচ্ছি না।

লক্ষ্মী। শুনলুম, কালিম নাকি তোমায় মেরেছে, তার হাতে তোমার সকল জালা জুড়িয়েছে।

রাজা। হাঁ মা, এ জালা কি মলেও জুড়াবে ? তুমি মা যোগিনী ; বিশ্বপ্রেমে তোমার প্রাণ ভরা, এ স্বদেশ-প্রেম তোমায় বোঝাব কি করে ?

লক্ষ্মী। সত্য কি তুমি স্বদেশকে এত ভালবাস ?

রাজা। সে কথা কি বলব ? এই মাত্র বলছিলাম আমার স্বদেশের জন্ত আমি আমার পরকালকেও জলাঞ্জলি দিতে পারি।

লক্ষ্মী। আচ্ছা মহারাজ, মাগ্নার বন্ধন কি ছিন্ন কতে পেরেছ ?

রাজা। কই পেরেছি, এই নখর দেহের অভ্যন্তরে অস্থি মাংসপেশী রক্ত কিছুই নাই—সমস্তটা স্বদেশের প্রীতি মমতায় ভরা। তবে আর মাগ্নার বন্ধন ছিন্ন কল্পুম্ কই ?

লক্ষ্মী। ও মাগ্না দেব-মহিমায় মণ্ডিত। তুমি জননী জন্মভূমির রক্ষার জন্ত বিব্রত, আর তোমার তনয়ার সংবাদ রাখ কি ?

রাজা। জগন্মাতা তাকে দেখবেন।

লক্ষ্মী। দেখেছেন ; তোমার কন্ঠা নিরাপদে আছেন, জগন্মাতা তাঁকে কোলে তুলে নিয়েছেন।

রাজা। সে কি !

লক্ষ্মী। তোমার কন্ঠা আর ইহসংসারে নেই।

রাজা। ষাও ষাও যোগিনি, তুমি অনেক মূর্তি ধরছ, অনেক খেলা খেলছ। সে দিন তুমি বীরকে পলাতক করেছ—আজ আবার জন্মের মত তার বুক ভেঙ্গে দিতে এসেছ ?

লক্ষ্মী। বুক ভেঙ্গে দিতে আসিনি রাজারাম, তোমার ভাঙ্গা বুক লোহার বর্ষ পরাতে এসেছি।

রাজা । তাই মর্ষব্যথার উপন্যাস রচনা করে এনেছ ?

লক্ষ্মী । উপন্যাস নয় ; আমি নিজের যা হই, এখন যে বেশ পরিধান করেছি, এর মর্ষাদা কখন ভুলিনি ; আমি মিথ্যা কহিতে আসিনি ।

রাজা । তবে তুমি আমার কণ্ঠার মৃত্যুর কথা বল্ছো কেন ?

লক্ষ্মী । শুধু কথা নয়, তোমার পুত্রও নেই ।

রাজা । তারপর--বলে যাও, বলে যাও । না, আর বল্বে কি ! যার যার কথা বল্বার ছিল, সবই তা বলা হ'ল ; বাস্, তবে তুমি জেনে শুনেই আমার এই ফকিরের বেশ পরিয়েছিলে ? যোগিনি, তুমি অনেক জ্ঞান দেখুছি ; আমার একটি উপায় বলে দিত পার ?

লক্ষ্মী । কি ?

রাজা । আত্মহত্যার পাপে লিপ্ত হতে না হয়, অথচ মরা যায় কেমন করে ?

লক্ষ্মী । পারি, অতি সহজ উপায় ; সেতারার দুর্গে যাও ; কস্থা দূরে নিক্ষেপ কোরে আবার অসি কবচ ধারণ কর ; বুদ্ধক্ষেত্রে শত্রুসম্মুখে অগ্রসর হও ; সেখানে যমদ্বারের লক্ষ পথ দেখতে পাবে ।

রাজা । আর কার জন্ত বুদ্ধ কস্তে যাব ?

লক্ষ্মী । তবে এতদিন কি কেবল আপনার পুত্র পরিবারের জন্ত বুদ্ধ করেছিলে ? নিজের সঙ্গীর্ণ স্বার্থের জন্ত, সহস্র সহস্র ধর্মবিখ্যাসী নির্দোষী সতীর স্বামী, পুত্রের পিতা, মাতার পুত্রের রক্তে মহারাষ্ট্র প্রাণিত করেছিলে ? এই না বল্ছিলে, মহারাষ্ট্রের জন্ত তুমি তোমার আত্মাকে পর্যাস্ত নিয়মগামী কস্তে পার ?

রাজা । আরে মূঢ় গর্কিত মানব, প্রবৃত্তির দাস, বাসনার দাস, মায়ার সংশয়পাশের দাসাত্বদাস—আমি আবার • স্বদেশপ্ৰীতির গর্ক করি ! মা ভৈরবি, আমার খুব দর্প চূর্ণ করেছ ।

লক্ষ্মী । যাও মহারাজপতি যাও, একমাত্র ভ্রাতৃহত্যার প্রতিবিধি-  
সার আগুন হৃদয়ে প্রজ্বালিত করে কার্যক্ষেত্রে অবতীর্ণ হয়েছিলে ; আজ  
সেই আগুনে আবার পুত্রহত্যার, কন্যাহত্যার ঠকন নিক্ষেপ হ'ল ; আগুন  
ধূ ধূ জ্বলুক । শুনে রাখ, তোমার পুত্রেরা বীরের মৃত্যু মন্তে পারনি ;  
পিপাচ কাশিম তাদের জীবন্ত দগ্ন করেছে ।

রাজা । এঁয়া—এঁয়া—

লক্ষ্মী । ওকি, কাতর কেন, টল্‌ছ কেন ? দাঁড়াও, খাড়া হয়ে  
দাঁড়াও, বজ্রনৃষ্টিতে অসি ধারণ কর । আগুন ধূ ধূ জ্বালাও ; পাপ ভয়  
কর—পাপ ভয় কর !

রাজা । যোগিনি, তুই কি ভবানী ?

লক্ষ্মী । আমি কে তা শুনে কি করবে বাবা ? যা বলি শোন ;  
আগুন ছড়াও, আগুন ছড়াও । সবাই শুনেছে তুমি মরেছ, বাদশাও  
হয়ত এতক্ষণ শুনেছে । আমিও তাই শুনেছিলুম, কিন্তু আমার ভ্রাস্তি  
ভেঙ্গে গেছে । তুমি নিজ পুত্রের মৃত্যু সংবাদ শুনে মোহে আকুল হয়ে  
উঠেছিলে ; আর একজনের পুত্রের মৃত্যু সংবাদ শোন ।

রাজা । আবার কে ; আবার কার সর্কনাশ হ'ল ?

লক্ষ্মী । সর্কনাশ কিনা জানিনা ; কিন্তু ধর্মের জন্ত, শক্তির জন্ত,  
তোমার জন্ত একটা মহাপুরুষের মহাপ্রাণ গেছে ।

রাজা । সে কি, আমার জন্ত !

লক্ষ্মী । হ্যাঁ, তোমার জন্ত । তানাজিকে মনে পড়ে ? সেই বৃদ্ধ  
সেনাপতির পুরুষোত্তম পুত্র সান্তাজি ।

রাজা । এঁয়া, সান্তাজি ! কি হয়েছে ?

লক্ষ্মী । তোমার—পরিচ্ছদ পরে সে বৃদ্ধক্ষেত্রে প্রবেশ করেছিল ।  
শোণিত-পিপাসার অন্ধ কাশিম রাজারাম ভ্রমে তাকে হত্যা করেছে ।

রাজা। আর আমি আপনার পুত্রশোকে অবসন্ন হয়ে তরবারি পরিত্যাগ কতে উদ্বৃত হয়েছিলাম। ধিক্ ধিক্, সহস্র ধিক্ আমার! যোগিনি, আর সহোদরের নর, পুত্রকণ্ঠার নর—সাস্তাজির মৃত্যুর প্রতিশোধ নেব; সত্যই অমুরনাশন মূর্তি ধারণ করব। যোগিনি, যখনই যখনই আমি বল হারাব, তুমি দয়া করে একবার আমার দেখা দিও। তোমার বিখনাশী ফুংকারে আমার প্রতিহিংসাগ্নি লক্ লক্ করে জলে উঠবে! দেখা দিও, যোগিনি, দেখা দিও।

## দ্বিতীয় দৃশ্য।

যুদ্ধক্ষেত্র।

আহত রজনীথ।

রজ। প্রায়শ্চিত্ত—প্রায়শ্চিত্ত! এ প্রায়শ্চিত্তে কত সুখ, কত শান্তি! কি শিক্ষা দিলে বাসন্তি, কি শিক্ষা দিলে লক্ষ্মী! আর কি তীব্রশিক্ষা মহারাষ্ট্ররাজ তোমার মহিমামণ্ডিত কুমার! আজ জীবন-ব্রতের উদ্‌ঘাপন। বাসন্তী বৈকুণ্ঠ আলো করে আছে! লক্ষ্মী—আমার তাক্কা, উপেক্ষিতা, পদদলিতা লক্ষ্মী—কে জানে কোথায়! আর আমার পিতৃতুল্য মহিপতি রাজারাম, চরমকালে তোমার পবিত্র চরণরেণু এ অভাগ্যের মস্তকে লাগে! আমার কর্মের শেষ, জীবনের শেষ—তুমি তোমার শেষ আশীর্বাদ অবশিষ্ট।

## [ রাজারামের প্রবেশ । ]

রাজা । এই যে বংশ, পুত্রাধিক প্রিয়, সমরজয়ী বীর, তোমার আলিঙ্গনপাশে আবদ্ধ করবার জন্ত আমার সাগ্রহপ্রসারিত বাহু তোমার অশ্বেশন কচ্ছে !

রঙ্গ । মহারাষ্ট্রপতি, বলুন—আমার পাপের কি প্রায়শ্চিত্ত আছে ?

রাজা । বংশ, যে মহালোকে তুমি মহাযাত্রা কচ্ছ, সেই মহালোকে শ্বরের পবিত্র চরণছায়ায় কর্মদগ্ধ জীবনের তীব্র জ্বালা নিবারণ করগে । যাও বীর, সন্মুখের বন্ধন ছিন্ন করে মায়াভীত লোকে গমন কর । তোমার জন্ত শোক করব না । অশ্রু, অন্ধপথে গতি সংযত কর ! বল বীর, মা অষ্টভূজা !

রঙ্গ । মা—অষ্ট—ভূ—জা—

( মৃত্যু । )

## [ পুষ্পমালামণ্ডিতা লক্ষ্মীর প্রবেশ । ]

লক্ষ্মী । কোথায় তুমি ! আমার চির আকাঙ্ক্ষিত, আমার আরাধনার দেবতা, আমার সর্বসাধনার ইষ্টদেব—কোথায় তুমি ? স্বামী, প্রভু—রক্তশ্রোতে পৃথিবী প্রাণিত, ধরণী শব্দসমাচ্ছন্ন ! কোথায় তুমি, একবার বল, উচ্চ কর্তে একবার বল—কোথায় তুমি !

রাজারাম । কে যোগিনি ? এ মহাশ্মশানেও তুই ! বল মা বল, প্রহোলকামায়, কার অবেষণে শোকোদ্ভোগিত উচ্চকর্তে গগনবন্ধ নিদারণ কচ্ছিস্ বল ?

লক্ষ্মী । আর কার ? আনার ইষ্টদেবতার ; আমার সর্বকামনার সার, সর্ব আশার আশার, সর্বপ্রীতির আদার হৃদয়-দেবতার ! বাঃ বাঃ, এই যে, এই যে—আগে-ধাক্তেই শয্যা রচনা করেছ ! তবে আমার ডাকনি কেন নাথ ? এখনও কি দাসী চরণে অপরাধিনী ? নাও, আমার সঙ্গে

নাও, কে মৃত্যুর বন্ধুর পথে তোমায় পরিচর্যা করবে! দাসীকে সঙ্গে নাও!  
রাজারাম। মা মা, বল্ কে তুই ?

লক্ষ্মী। বাবা, আমি কর্ণাটের জায়গীরদারের কন্যা—বড় অভাগিনী,  
আজীবন প্রতিশ্রম-কাঙালিনী।

রাজারাম। মা মা, আয় আয়! আমার গৃহ নেই; গৃহ শ্মশান  
হয়েছে! আয় মা—আমার সংসার-শ্মশানে তোকে নিয়ে গিয়ে মহা-  
কাণীর প্রতিষ্ঠা করি।

লক্ষ্মী। না বাবা, আর ত ফিরবো না! কেন ফিরবো? জীবনে  
কখনও স্বামীর আদর পাইনি; স্বামীর কাছে কখন এ হৃদয়-জ্বালা জুড়াবার  
অবসর ঘটে নি; কখন স্বামীর পদসেবার অধিকার লাভ করিনি!  
উপেক্ষায় গঠিত জীবন, উপেক্ষায় তীব্র অনলে দগ্ধ হৃদয় স্বামীর এক  
বিন্দু করুণালাভের জন্ত উন্মাদিনী-বেশে পথে পথে ফিরেছি; দেশে দেশে  
ছায়ার মত তাঁর অনুসরণ করেছি; উদ্ভ্রান্ত পন্থাহারা স্বামীর মঙ্গলের  
জন্ত বান্দী-বেশে মোগলের পরিচর্যা করেছি! আজ আমার সেই  
চির-আরাধ্য স্বামী মৃত্যুশয্যায়! ঐ চরণপ্রান্তে স্থান দেবার জন্ত আমার  
ডাকছেন—আরত ফিরবো না! আজ আমার স্বামিমিলনের দিন—আরত  
ফিরবো না! আজ আমার ফুলশয্যার দিন—আরত ফিরবো না! এই স্থাখ,  
এই শুভ মিলনের দিনে আজ আমি রক্তাধরা—আরত ফিরবো না!

### [ গোবর্দ্ধনের প্রবেশ। ]

গোবর্দ্ধন। দিদি দিদি, এই স্থাখ, আমিও কেমন রাজা কাপড় পরে  
এসেছি! আমার ফেলে যাস্ নি!

লক্ষ্মী। গোবর্দ্ধন, ভাই ভাই, আনন্দ কর, আনন্দ কর, প্রাণভরে  
আনন্দ কর; আমি স্বামীর ঘর কস্তে চলেছি! আর লাভস্নেহের শৃঙ্খলে

চতুর্থ অঙ্ক ]

বীরপুত্র

[ দ্বিতীয় দৃশ্য ]

আমার গতি আবদ্ধ করিস্নি ! ঐ দেখ—ঐ আমার স্বামী আমার  
ডাকচেন ? আর অপেক্ষা কতে পারি না ; বাই—বাই—

( মৃত্যু । )

গোবর্দ্ধন । দিদি চলি ! সঙ্গে নিলিনি ! দে তোর একটু পারের ধূলা  
দে, বাঙ্গালী জীবন সার্থক করি ! ধন্য গোবর্দ্ধন ; ধন্য, শুনিখোর ভেতো  
বাঙ্গালী—আজ তোর জন্ম সার্থক, জীবন সার্থক ! যাও দিদি যাও ; যাও  
মা যাও ; আর তুমি আমার দিদি নও, আর তুমি আমার মা নও—তুমি  
আমার জগন্মাতা ; তুমি আমার—কালী তারা মহাবিদ্যা ঘোড়শী ভুবনেশ্বরী !

( লক্ষীর চরণে গোবর্দ্ধনের প্রণাম । )


যবনিকা পতন ।



## গ্রন্থকার-প্রণীত পুস্তকাবলী :-

স্বর্ণহার ( নাটক ) ক্লাসিক থিয়েটারে অভিনীত ...	৫০
জাগরণ ( নাটিকা : মিনার্ভা থিয়েটারে অভিনীত ...	১৬০
গুরু গোবিন্দ ( নাটক ) ... ..	১০
ময়ূর সিংহাসন ( কোহিনূর থিয়েটারে অভিনীত ) ২য় সংস্করণ ...	১
বেতলা ( ফাঁচ থিয়েটারে অভিনীত ) ২য় সংস্করণ ...	১
ভক্তকবাব ( মনোমোহন থিয়েটারে অভিনীত ) ...	১
পম্পার পরিণাম ( পঞ্চাঙ্গ নাটক ) ... ..	১
বীরপূজা ৩য় সংস্করণ ( কোহিনূর থিয়েটারে অভিনীত )	১
বনিকবালা ( উপন্যাস ) ... ..	১০
অদৃশ্যের পরিহাস ( উপন্যাস ) ... ..	১১০
চক্রেচাকা ( প্রহসন ) ম্যাডেন থিয়েটারে অভিনীত ...	১৬০
রাম-রহিম ( ধর্মমূলক উপন্যাস ) ... যন্ত্রস্থ—	
ভি. পি. পি ( সমাজিক প্রহসন ) ... ..	১১০
ললিত প্রসঙ্গ ( তৃতীয় সংস্করণ ) আই এ পরীক্ষার পাঠ্য	১১০
প্রসঙ্গ মালা ( দ্বিতীয় সংস্করণ ) ... ..	১০
মনোহর পাঠ ( দ্বাদশ সংস্করণ ) ... ..	৬০
ঐতিহাসিক প্রসঙ্গ ... ..	২০
ভূগোল প্রসঙ্গ ( দশম সংস্করণ ) ... ..	২০





NOTES ON  
**POEMS OF TO-DAY**

S. BANERJEE, M. A.

**KAMALA BOOK DEPOT, LTD.**